




6641  
2045  
23



元和郡縣圖志卷第八

河南道四

鄭滑節度使 滑州 鄭州

陳許節度使 許州 陳州

滑州 靈昌 開元戶五萬三千六百二十七 鄉一百五

今為鄭滑節度使理所

管州二 滑州 鄭州

縣十四 都管戶二萬二千


禹貢兗州之域春秋時為衛國左傳曰狄滅衛衛立戴公以廬

於曹 今州城東北五里白馬 衛文公自曹邑遷於楚丘 今衛南

衛成公又遷於帝丘 今濮州濮陽縣是也 戰國時其地屬魏始皇五年拔



唐



撰



魏二十城初置東郡漢因之後漢末袁紹以曹公爲東郡太守  
東晉時慕容德自鄴南徙滑臺僭號南燕都於胙城至超徙都  
廣固爲宋所滅宋武帝既平慕容之後盡得河南之地於此置  
兗州仍置東郡宋之北境守在此其城在古滑臺甚險固後屬  
後魏宋文帝使王玄謨攻圍二十日不能取隋開皇九年又於  
今州理置杞州十六年改杞州爲滑州取滑臺爲名大業三年又改  
爲東郡武德元年罷郡置滑州二年陷寇四年討平王世充依  
舊置滑州

州境

東西二百三十六里  
東北一百四十九里

八到

西南至上都一千四百四十里  
東北至濮州二百一十五里

南至汴州二百一十里

正西微南至衛州一百五十里

西南至鄭州三百里

北至相州一百三十里

東南至曹州二百四十里

貢賦

開元貢元和貢

方紋綾

賦

綿絹

管縣七

白馬

韋城

衛南

胙城

靈昌

酸棗

匡城

白馬縣

望郭下

本衛之曹邑漢以爲縣屬東郡因白馬津爲名隋

開皇三年屬汴州九年屬杞州十六年改杞州爲滑州縣又屬

焉

白馬山在縣東北三十四里開山圖曰有白馬羣行山上悲鳴

則河決馳走則山崩津與縣蓋取此山爲名

黃河去外城二十步

州城卽古滑臺城城有三重又有都城周二十里相傳云衛靈  
公所築小城昔滑氏爲壘後人增以爲城甚高峻堅險臨河亦

有臺慕容時宋公遣征虜將軍任仲德攻破之卽魏武帝破袁紹斬文醜於此岸者

鹿鳴故城在縣北三十里宋書宋將王玄謨據滑臺宣令走鹿鳴城是也

黎陽津一名白馬津在縣北三十里鹿鳴城之西南隅酈食其說漢祖曰守白馬之津塞飛狐之口以示諸侯則天下知所歸矣謂此津也建安五年曹公征先王先主奔袁紹曹公擒關羽拜爲偏將軍紹遣顏良攻劉延於白馬曹公使羽擊之羽刺殺良於萬眾之中遂解白馬之圍後慕容德爲魏軍所逼率戶四萬餘徙於鹿鳴達黎陽津昏而冰合是夜濟河訖旦而魏師至冰亦尋泮德悅以爲神助因改黎陽津爲天橋津

河橋祠在縣南一里漢王尊爲東郡太守河水盛浸瓠子隄尊

臨決河不去後人嘉尊壯節因爲立祠

韋城縣上西北至州六十里本漢白馬縣地殷伯豕韋之國也左傳范

宣子曰昔我之祖在夏爲御龍氏在商爲豕韋氏杜註東郡白馬縣東南有韋城是也隋開皇六年分白馬縣南境置韋城縣屬汴州九年屬杞州十六年屬滑州

京觀在縣北二百步王莽篡漢東郡太守翟義舉兵莽遣將王邑等八將敗義於此乃築焉俗號髑骨臺

衛南縣上西南至州五十五里本漢濮陽縣地隋開皇十六年於此置楚

丘縣屬滑州後以曹州有楚丘縣改今名

鐵丘在縣東南一十里

故鉏城在縣東一十五里左傳后羿自鉏遷於窮石是也

胙城縣上北至州九十里本古之胙國左傳凡蔣邗茅胙祭周公之允

也又爲古之燕國左傳衛人燕師伐鄭是也漢爲南燕縣其後慕容德都之復號東燕縣隋開皇三年廢東郡以縣屬汴州十八年文帝因覽奏狀見東燕縣名曰今天下一統何東燕之有遂改爲胙城屬滑州武德二年於此置胙州領胙城又置東燕縣四年廢州胙城屬滑州

石丘在縣東北三十里俗傳漢成帝時星隕之石也

濮水在縣南二十里西南自酸棗縣界流入

靈昌縣上 東北至 州七十里 本漢南燕縣地自漢至隋不改開皇十六

年分東燕酸棗二縣置靈昌縣取靈昌津爲名屬滑州

黃河在縣北一十里

赤眉故城在縣東二十四里漢末赤眉賊帥樊崇築

延津卽靈昌津也在縣東北二十二里初石勒伐劉曜至河渚

不得渡時流漸下流因風結冰濟訖泮勒自以爲得天助故號

靈昌津又左傳鄭太叔收貳以爲己邑至於廩延又曹公北救

劉延至延津皆此津也

酸棗縣望 東北至 州一百二十里 本秦舊縣屬陳留郡以地多酸棗其仁

入藥用故名後魏併入小黃宣武帝復置改屬東郡隋開皇三

年屬汴州九年屬杞州十六年改屬滑州

黃河在縣北二十里

酸棗故城在縣西南一十五里六國時韓王所理處舊址猶存

金隄在縣南二十三里漢文帝時河決酸棗東潰金隄卽此隄

也

匡城縣上 西北至 州一百里 古衛之匡邑論語子畏於匡至漢爲長垣

縣地自漢至後魏不改隋開皇十六年於此置匡城縣屬滑州

故匡城在縣西南一十里

故蒲城在縣北一十五里左傳齊侯衛侯胥命於蒲子路為蒲宰皆此也

訾婁故城在縣西北一十六里

故鶴城在縣西南十五里衛懿公養鶴於此

鄭州滎陽開元凡六萬四千六百一十九鄉一百二十四元和戶一萬三千九百四十四鄉一十八

禹貢豫州之域春秋時為鄭國本高辛氏火正祝融之墟也周

宣王母弟友為周司徒食采於鄭是為鄭桓公後幽王為犬戎

所殺桓公死之其子武公與平王東遷平定虢檜之地故左傳

曰我周之東遷晉鄭焉依是也自武公後二十二君至六國時

鄭為韓哀侯所滅哀侯二年韓自平陽徙都鄭秦并天下屬三

川郡漢高祖改三川為河南郡滎陽屬焉晉武帝分河南置滎

陽郡東魏孝靜帝分滎陽置成臯郡高齊文宣帝又改為滎陽

郡周改為滎州隋開皇三年改滎州為鄭州十六年分置管州

大業二年廢鄭州改管州為鄭州隋末陷賊武德四年五月擒

建德王世充東都平其月置鄭州理武牢其年又於今鄭州理

置管州貞觀元年廢管州七年自武牢移鄭州於今理

州境東西一百七十六里

八到西至上都一千一百四十里

西至東都二百八十里

東至汴州一百四十二里

南至許州一百八十六里

東北至滑州三百里

北至黃河八十里

貢賦開元貢麻黃賦絲絹

管縣七 管城 滎陽 滎澤 原武 陽武 新鄭

中牟

管城縣望郭下本周封管叔之國自漢至隋皆為中牟縣隋開皇十六年於此置管城縣屬管州大業二年改管州為鄭州縣又屬焉

梅山縣西南三十里春秋時楚為子馮帥師侵費滑右同梅山即此山也

圃田澤縣東三里

故市城縣西北三十里曹操擊袁紹軍於故市即此城也

武強城縣東三十一里曹參擊項羽還攻武強即此城也

祭城縣東北一十五里

邙城縣東六里晉荀林父帥師與楚子戰於邙即此城也

李氏陂縣東四里後魏孝文帝以此陂賜僕射李冲故俗呼為

僕射陂周迴十八里

滎陽縣緊東至州六十里本漢舊縣晉屬滎陽郡高齊改郡名成臯以

縣屬焉隋開皇三年罷郡以縣屬鄭州萬歲通天元年改為武

泰縣仍隸河南府神龍初復為滎陽屬鄭州

京水出縣南平地

索水出縣南三十五里小徑山

古大索城今縣理是也楚漢戰於京索間漢書注京縣有大索

亭小索亭晉末滎陽人張卓董遇鳩集流散守固此城因名大

柵塢今呼為大刺蓋音之訛耳

小索城縣北四里宋南平王鑠遣王陽兒據小索破魏即此城

也

京縣故城縣東南二十里即鄭京城太叔之邑

滎澤縣望東南至州五十里本漢滎陽縣地隋開皇四年分滎陽置廣

武縣取山爲名仁壽元年改爲滎澤屬鄭州

廣武山在縣西二十里一名三皇山

敖山縣西十五里春秋時晉師救鄭在敖郟之間敖郟二山名宋武帝北征記曰敖山秦時築倉於山上漢高祖亦因敖倉傍山築甬道下汴水卽此山也

滎澤縣北四里禹貢濟水溢爲滎今濟水亦不復入也

黃河北去縣十五里

東廣武西廣武二城各在一山頭相去二百餘步在縣西二十里漢高祖與項羽俱臨廣武而軍今東城有高壇卽是項羽坐太公於上以示漢軍處

踐土臺故王宮縣西北四十五里左傳晉文公作王宮於踐土卽此也

敖倉城縣西十五里北臨汴水南帶三皇山秦所置仲丁遷於囂此也詩曰薄狩于敖卽此地也

金隄縣西北二十二里漢文帝時河決酸棗潰金隄東郡大興卒塞之孝武帝時王尊爲東郡太守又加修築至明帝永平十二年詔樂浪人王景築隄起自滎陽東至千乘海口千餘里十里立一水門更相迴注無復潰漏之患此隄首也

原武縣

緊東至州六十里

本漢舊縣屬河南郡後魏屬滎陽郡東魏改

置廣武縣又屬焉高齊天保七年郡縣並廢隋重置原武縣屬鄭州武德四年屬管州貞觀元年復屬鄭州

黃河縣北二十里

古陽池城竹書紀年曰惠王十五年遣將龍賈築陽池以備秦卽此也隋開皇六年於此置縣今縣理

陽武縣

緊州一百里西南至

本漢舊縣屬河南郡晉屬滎陽郡

黃河縣北三十里

南棣城北棣城二故城在縣北十里春秋楚伐陳諸侯會於北棣以救之此也

汴渠一名菑宕渠今名通濟渠西南自滎澤管城二縣界流入博浪沙在縣南五里張良爲韓報仇擊始皇處

新鄭縣

緊州九十里東北至

本有熊氏之墟又爲祝融之墟於周爲鄭

武公之國都韓哀侯滅鄭自平陽徙都之秦并天下其地爲潁川郡漢以爲新鄭縣屬河南郡晉省隋開皇十六年重置屬鄭

州

陘山縣西南三十里史記魏敗楚於陘山山上有子產墓墓累石爲方墳墳東有廟皆東向卽杜元凱終制所言者

函陵縣北十三里左傳晉侯秦伯圍鄭晉軍函陵秦軍汜南此也

溱州府城卽東魏河南道行臺侯景營軍之壘

溱水源出縣西北三十里平地

鄆城縣東北三十二里

洧水縣西北二十里灌潁渠首受洧水西魏遣王思政固守長社城東魏相高澄遣將清河王高岳攻之築堰通洧水渠灌破長社城卽此渠也

中牟縣

緊州七十里西至

本漢舊縣屬河南郡晉屬滎陽郡魏太武帝

省東魏孝靜帝分滎陽置廣武郡隋氏避諱改爲內牟屬管州今縣理是也開皇十八年改爲圃田縣大業十三年陷李密武德三年李勣招撫東夏於此置牟州復改爲中牟貞觀元年屬

汴州龍朔二年復隸鄭州縣理卽古中牟故城論語佛肸以中牟叛後漢魯恭爲縣宰有善政人爲立祠

圃田澤一名原圃縣西北七里其澤東西五十里南北二十六里西限長城東極官渡上承鄭州管城縣界曹家陂又溢而北流爲二十四陂少鵠大鵠小斬大斬小灰大灰之類是也

官渡臺俗號中牟臺亦名曹公臺在縣北一十二里曹操破袁紹於此

許州 潁川 開元戶五萬九千七百十七 鄉一百十七

今爲陳許節度使理所

管州二 許州 陳州

縣十三 都管戶九千三百二十九

禹貢豫州之域周又爲許國春秋定公六年鄭滅許七年又封許自是附庸於鄭周末爲晉地三卿分晉其地屬韓秦滅韓虜韓王安以其地置潁川郡理陽翟漢高帝五年爲韓國以韓信爲王六年復爲潁川郡後漢獻帝初遭董卓之亂遷都長安卓死東歸於洛魏太祖迎帝都許及魏受禪改許縣爲許昌縣然魏雖都洛而宮室武庫猶在許昌又析潁川增置襄城郡晉咸和二年征西庾亮表成帝曰潁川襄城本是一郡戶口今少請還合潁川從之宋受禪後魏明帝使達奚斤伐宋長驅至武牢潁川許並入於後魏後又陷於東魏高澄就古潁陰城改置南鄭州卽今州城是也隋仁壽元年改南鄭州爲許州隋末陷王世充武德四年討平世充復爲許州

州境 東西二百一十七里 南北一百六十六里

八到 西至上都一千二百六十里 西北至東都三百四十里

北至鄭州一百八十六里  
東南至陳州二百六十里  
東北至汴州二百三十里  
正南微東至蔡州三百里

賦開元貢 蔗心席六領 緜絹二十匹

乾柿

管縣七 長社 長葛 許昌 鄆陵 臨潁 舞陽

扶溝

長社縣郭下 本漢舊縣屬潁川郡春秋時鄭長葛地其社中樹

暴長漢更名長社後漢屬郡不改隋文帝廢郡以縣屬汴州大

業三年改為潁川縣武德四年復為長社改屬許州

潁水西南自襄城縣界流入

潁水俗名勅水經縣西其源出密縣大隗山

長葛縣緊南至 本漢長社縣地隋分置長葛縣屬許州取舊

名

洧水自北流入去縣十三里

長箱城東魏武定五年清河王高岳率眾圍西魏將王思政於

潁川因築此城初以車箱為樓因名長箱城隋開皇六年又於

此立縣今縣理是

長葛故城縣北十三里

長社故城縣西一里西魏大統十三年詔遣河南行臺大都督

王思政進據潁川東魏遣將清河王高岳率眾十萬圍潁川思

政不與戰岳造高堰引洧水以灌城十五年潁川城陷水自東

北入城思政為岳所執即此城也

東偏城縣東北五里左傳齊人鄭人伐許許莊公奔衛鄭伯使

百里奉許叔居許東偏即此城也

許昌縣上西南至 本許國為楚所滅至漢為縣屬潁川郡後

漢因之魏太祖迎獻帝都許文帝受禪改為許昌宋志無許昌縣天平元年復置今縣理是也高齊文宣帝省鄆陵入許昌隋文帝又於鄆陵縣置洧州以縣屬焉大業二年廢洧州以縣屬許州初魏武帝既破黃巾經略四方而苦軍食不足羽林監潁川棗祗建置屯田於是以任峻為典農中郎將募人屯田許下即今許昌縣得穀百萬斛郡國列置田官數年之間所在倉儲盈積洧水西北自長葛縣流入去縣三十里

許昌宮在許昌故城中楊修作許昌宮賦即此宮也

魯城縣南四十里左氏鄭伯請以太山之祊易許田而祀周公即此城

景福殿基址今在許昌故城內西南隅

鄆陵縣上西南至州七十五里本漢舊縣屬潁川郡春秋鄭伯克段於鄆

晉楚戰於鄆陵並此地後魏潁川置許昌郡仍立鄆陵縣以屬焉高齊文宣帝廢鄆陵以其地入許昌縣隋開皇三年復置屬許州十六年又於縣理置洧州縣仍屬焉大業二年廢洧州以鄆陵屬許州

洧水西北流入經縣西十里

鄆陵故城縣西北十五里

太丘城縣西南二十里陳寔嘗為此縣長

故陶城縣南五十里相傳晉陶侃征杜弼所築

臨潁縣上西北至州六十里本漢舊縣屬潁川郡歷代因之隋開皇三

年罷郡以縣屬許州大業四年自故城移於今理建中二年屬

潁州貞元二年州廢依前屬許州

臨潁阜東西長五十里即龍脾岡也嵩高山東南三百里有龍

脾其地沃壤可居卽此岡也今臨潁縣理在岡上

潁水西北自長社縣界流入

繁昌故城縣西北三十里魏文帝行至繁陽亭築壇受禪因置

繁昌縣卽此城也

舞陽縣上東北至州一百六十里本漢舊縣屬潁川郡在舞水之陽因名

漢封樊噲魏封司馬宣王並爲舞陽侯皆此邑自漢至晉不改

宋省開元四年重於故城內置

扶溝縣望西至州一百一十里本漢舊縣屬淮陽國後漢屬陳留郡魏屬

許昌郡高齊文宣帝自今縣北移於今理武德四年置北陳州

縣隸焉其年廢州以縣屬洧州九年洧州廢又屬許州

洧水縣西二十二里

陳州淮陽開元戶五萬二千六百九十二鄉一百四

禹貢豫州之域本太昊之墟周武王封媯滿於陳春秋時楚滅

之秦滅楚屬潁川郡漢高帝分潁川置淮陽國後漢章帝改爲

陳國獻帝末陳王植爲袁紹所殺國除爲陳郡曹魏復爲陳國

以東阿王植爲陳王植子志徙封濟北又爲陳郡晉宋因之東

魏孝靜帝以淮南內附置北揚州理項城乃於項城僑立北丹

陽郡及稜陵縣高齊文宣帝以百姓守信不附侯景改北揚州

爲信州周武帝改信州爲陳州隋開皇二年改爲沈州大業二

年廢沈州入陳州三年改爲淮陽郡武德元年復爲陳州

州境東西一百六十九里

八到西至上都一千五百二十里

北至東都六百六十里

東南至潁州三百里

北至許州二百六十里

西南至蔡州二百二十里  
東北至宋州二百二十五里

貢賦

開元貢  
元和貢

絹十五匹

賦粟麥

管縣六 宛丘 太康 項城 南頓 澠水 西華

宛丘縣郭下 本漢陳縣春秋時楚滅陳縣之秦漢仍為陳縣漢

屬淮陽國後漢屬陳郡晉屬梁國宋屬陳郡高齊文宣帝省陳

郡仍移項縣理於此隋文帝罷陳郡改項縣為宛丘縣

陳州城枕蔡水周迴三千里

宛丘縣南三里爾雅陳有宛丘又丘上有丘為宛丘注四方高

中央下曰宛

固陵縣西北四十三里項羽敗南走固陵此也

洧水西自許州鄆陵縣界流入

蔡水自西北流入經縣理東一里

州理城楚襄王所築即古陳國城也包羲氏神農氏並都於此

及楚頃襄王為秦所伐失鄆郢徙都於陳卒為秦所滅

弩臺在縣理古陳城南八十步後漢陳敬王曾孫寵善弩射十

發皆同處常於此臺教弩黃巾賊起寵有強弩千張故惟陳國

保全開元九年移孔子廟於臺上

東門池在州城東門內道南詩陳風東門之池可以漚麻即此

池也

八卦臺及壇縣北一里古伏羲氏始畫八卦於此

太康縣南至本漢陽夏縣地屬淮陽國後漢屬陳國後魏

孝昌四年置陽夏郡以縣屬焉隋文帝改陽夏為大業縣

蔡水西北自汴州尉氏界流入

渦水首受蔡水東流經縣北

縣理城卽漢陽夏縣城夏后太康所築漢五年高祖追擊項羽至陽夏南羽敗走固陵是也

項城縣上西北至漢項縣古項子國春秋齊師滅項至楚襄

王徙都陳以項爲別都按此城卽楚築在漢屬汝南郡晉屬陳國隋文帝改項縣加城字屬陳州東晉孝武帝時秦將苻融攻陷壽春苻堅舍大軍於項城輕騎八千兼道赴之時有謠曰堅不過項堅出令曰敢言吾在壽春者拔其舌眾諫不從堅遂敗武丘縣東南四十里本名丘頭魏王凌密謀廢立司馬宣王將中軍討凌大軍掩至百尺堰凌自知勢窮軍到丘頭面縛水次因改丘頭爲武丘以旌其功卽此也

小汝水西南流入去縣五十里

公路故城縣東四里漢末袁術所築

故誘城縣北三十里魏毋丘儉作亂西至項鄧艾督軍至樂嘉以誘之後人因謂之誘城

百尺堰縣東北三十五里司馬宣王討王凌軍至百尺堰卽此地

南頓縣上北至州本漢舊縣屬汝南郡古頓子國後逼於陳

南徙故號南頓其城楚令尹子玉所築後漢世祖父欽嘗爲此縣令故號南頓君光武生於此縣中宋爲南頓郡東魏於此置和城縣

北齊廢郡省縣入和城隋復爲南頓縣屬陳州武德六年省入項城證聖元年以縣有光武鄉名符武氏遂於此置光武縣中

宗復爲南頓

潁水縣西北三十里

小汝水縣西南四十里

高陽三縣南四十里應瑒南頓人兄弟俱有名自比高陽才子故號高陽三

澠水縣上北至州八十四里本漢汝陽縣屬汝南郡晉屬汝南國宋又

屬汝陽郡隋開皇三年屬陳州十六年改汝陽為澠水縣建中二年屬澠州興元二年澠州廢改屬陳州

澠水經縣北去縣三里

澠灌城縣東北二十五里本魏將鄧艾所築艾為典農使行陳潁之間東至壽春艾以為田良水少不足盡地利遂開築陂塘大興澠灌軍儲豐足因名此城

乾谿臺在縣北三里左傳楚靈王有乾谿之臺即此也


西華縣上東至州八十里本漢舊縣屬汝南郡後漢因之晉無西華縣

宋復置屬陳郡高齊省後魏太和中復置武城縣神龍元年又為基城景雲復為西華

潁水縣南二十里

洧水縣南二十里

集糧城在縣西十里魏使鄧艾營田築之貯糧故名



元和郡縣圖志卷第八終

元和郡縣圖志卷第九

唐 李吉甫 撰

河南道五

徐泗節度使 徐州 宿州 泗州 濠州

蔡州節度使 蔡州 申州 光州

徐州 彭城 開元戶四萬九千七百二 鄉九十二  
元和戶三千八百五十八 鄉八十九

今為徐泗節度使理所

管州四 徐州 宿州 泗州 濠州  
縣一十六 都管戶三萬七千二百五十二

本禹貢徐州之域春秋時為宋滕薛小邾偃陽之地六國時屬楚秦并天下為泗水郡楚漢之際楚懷王自盱眙徙都之後項羽遷懷王於郴自立為西楚霸王又都於此漢改泗水郡為沛

郡又分沛郡立楚國按楚國卽今州理是也宣帝地節元年更爲彭城郡尋復爲楚國自漢以來或理彭城或理下邳晉氏南遷又於淮南僑立徐州安帝始分淮北爲北徐州宋永初二年加淮南徐州曰南徐州而改北徐州曰徐州明帝時淮北入魏梁初暨收太清之後尋復入魏徐州復理彭城仍立彭城郡高齊及後周不改隋開皇二年於此置總管罷郡其所領縣並屬徐州十四年廢總管府爲彭城郡隋亂陷賊武德四年討平王世充改置徐州總管府七年改爲都督貞觀十七年罷都督初宋高祖經略中原以彭城險要置府於此至文帝時王玄謨又上表曰彭城南界大淮左右清汴城隍峻整襟衛周固自淮已西襄陽已北經途三千達於齊岱六州之人三十萬戶常得安全實由此鎮後魏大將軍尉元上表曰彭城宋之要藩南師來侵莫不用之以陵諸夏輿地志云郡城由來非攻所能拔按自隋氏鑿汴以來彭城南控埧橋以扼汴路故其鎮尤重

州境 東西二百六十九里 南北六百八十九里

八到 西至上都二千八十里 西至東都一千二百二里 東南至泗州五百九十里 東北至沂州三百五十里 南取埧橋路至宣州五百里 西南取蕭縣路至宋州三百一十里 東南至濠州三百九十里 西北至兗州三百四十里

貢賦 開元貢 五色土各一斗 上細絹 賦 絲 絹

管縣五 彭城 蕭 豐 沛 滕

彭城縣 望 郭下 古大彭氏國也漢爲彭城縣屬楚國後漢屬彭城

國宋屬彭城郡隋文帝罷郡爲縣屬徐州

定國山在縣東四里後魏武定五年慕容紹宗欲擊梁貞陽侯

蕭明營於此山

泗水在縣東去縣一十步

州理城貞觀五年築其外城卽古大彭氏國漢高祖定天下以爲楚國封弟交爲楚王東晉封劉裕爲宋公至宋武帝以皇子義康爲彭城王並都於此後宋平北將軍徐州刺史薛安都乃舉城歸魏

呂梁故城在縣東五十七里春秋時宋之呂邑至漢以爲呂縣城臨泗水高一百四十尺周迴十七里此城東二里有三城一在水南一在水中渾上一在水北並高齊所築立鎮以防陳寇曹公故城在縣東南六十五里在呂梁東岸或言曹公築此以守呂布西岸有城臨水是布之所固也號曰呂布固

故垞城在縣北二十六里或曰古崇侯國兗州人謂實中城曰

垞

戲馬臺在縣東南二里項羽所造戲馬於此宋公九日登戲馬臺卽此

寒山堰在縣東南一十八里梁蕭明伐魏堰清水以灌彭城

呂梁在縣東南五十七里蓋泗水至呂縣積石爲梁故號呂梁陳將吳明徹以舟師破下邳進屯呂梁堰泗水以灌徐州周將軍烏丸軌達奚長孺率兵救援軌取車輪數百連鎖貫之橫斷水路然後募壯士夜決堰至明陳人始覺潰亂爭歸至連鎖之處生擒明徹

蕭縣

上東北至州六十里

本古之蕭國春秋時宋邑漢蕭縣屬沛郡北

齊改爲承高縣屬彭城郡隋開皇三年罷郡屬徐州改爲龍城縣尋復爲蕭縣

丁公山在縣東南二十里丁公追漢高帝處

綏輿山在縣東二十五里宋高祖綏輿里人蓋因里以名山也  
睥井在縣北二百步左傳楚子伐蕭還無社與司馬卯言目於  
睥井而拯之卽此也

豐縣上東南至州一百七十五里本漢舊縣屬沛郡戰國時屬梁後漢屬沛

國晉同宋改屬北濟陰郡北齊改郡爲永昌以縣屬焉隋改屬  
徐州

豐西澤在縣西一十五里漢高祖斬白蛇於此

沛縣上東南至州一百四十三里本秦舊縣泗水郡理於此蓋取沛澤爲縣

名漢興四年改名沛郡領三十七縣理相城以此爲小沛魏分  
立譙郡又以沛爲王國晉不改宋爲沛縣改屬徐州隋文帝罷  
郡縣屬仍舊

微山上有微子冢去縣六十五里

泗水西北流入東去縣五十步

泡水卽豐水也西去縣一百五十步

縣理城卽秦沛縣城也初陳涉起沛令欲以沛應之乃令樊噲  
召高祖沛令後悔閉城拒守高祖書帛射城上曰諸侯並起今  
屠沛沛今共誅令卽家室完父老乃殺沛令迎高祖立爲沛公  
十二年高祖破黥布還過沛謂沛父老曰遊子悲故鄉吾雖都  
關中萬歲後吾魂魄猶思樂沛且朕自沛公以誅暴逆其以沛  
爲朕湯沐邑

故留城在縣東南五十五里高祖令張良自擇齊三萬戶良曰  
始臣起於下邳與陛下會留乃封良爲留侯

故沛宮在縣東南一里高祖過沛置酒歌大風卽此宮也

泗水亭在縣東一百步高祖微時爲亭長於此

滕縣上南至州二百里本古滕國漢蕃縣也屬魯國宋屬彭城郡漢末

太傅陳蕃子逸爲魯相改音皮後魏置蕃郡以縣屬焉北齊郡

縣並廢隋於此置滕縣屬徐州按古滕國在縣西南十四里滕

城是也

奚公山在縣東南六十六里奚仲初造車於此

公丘故城在縣西南十五里夏侯嬰初爲滕令故號滕公按此

時高祖未立屬縣故滕爲秦縣至武帝改爲公丘縣屬沛國

故薛城在縣東南四十三里薛侯國也孟嘗君時薛中六萬家

其中富厚天下無比此田文以抗禦楚魏也

合鄉故城在縣東二十三里卽論語所謂互鄉是也

宿州上符離開元戶元和戶八千六百七十六一鄉三十六

本徐州符離縣也元和四年以其地南臨汴河有埃橋爲舳舻

之會運漕所歷防虞是資又以蘄縣北屬徐州疆界闊遠有詔

割符離蘄縣及泗州之虹縣置宿州取古宿國爲名也

州境

八到

西北至上都一千九百里  
西北至東都一千四百里  
東南至泗州四百二十里  
東南至淮百里與濠州分中流爲界從界至濠州一百里  
北至徐州一百五十里  
西至宋州三百三十里

貢賦

管縣三 符離 蘄 虹

符離縣上北至州一百五十里本秦舊縣漢屬沛郡高齊時屬睢南郡隋

開皇三年罷郡以縣屬徐州爾雅曰莞符離也以地多此草故

名

睢水自縣西北流入

故相城在縣西北九十里蓋相土舊都也

靈璧故城在縣東北九十里漢二年漢王入彭城項羽以精兵

三萬人晨擊漢軍於靈璧東睢水上大破之睢水為之不流

蕪縣上北至州二百里本秦舊縣漢屬沛郡後漢屬沛國有大澤

鄉陳涉起兵於此為狐鳴宋於此置譙郡齊以為北譙郡後魏

改蕪縣為蕪城縣隋開皇三年去城字屬仁州即今宿州是也大業二

年屬徐州八年屬譙州後復隸徐州

淮水西南流入經縣南七十里

渙水西自臨渙縣界流入

渦水東去縣一百里

蕪水北去縣二十里

虹縣上西至州二百里本漢舊縣屬沛郡虹音貢漢書作瑁字梁武帝

於此置貢城戍後魏復置虹縣周大象中省以其地屬晉陵縣

隋開皇十八年改晉陵為夏丘縣武德四年於今縣南一百里

故虹城重疊置虹縣屬仁州貞觀八年屬泗州十三年移於今

縣理臨汴河

赤坎故城在縣西南五十九里梁天監八年置赤坎戍

潼陂一名萬安湖周迴二十里在縣北五里

垓下聚在縣西南五十四里漢高祖圍項羽於垓下大破之即

此地也按漢浚縣屬沛郡浚音絞垓下即浚縣之聚落名也圖經

云項羽墓在縣南六里按羽死後高祖以魯公禮葬羽於穀城

在今鄆州東阿縣界言在此俗說之謬也

廣濟渠按開元二十七年河南採訪使齊澣以江淮運漕經淮

水波濤有沈溺之憂遂開廣濟渠下流自虹縣至楚州淮陰縣北十八里合于淮踰時畢功後以水流峻急行旅艱阻旋又停廢卻由舊河

泗州臨淮開元戶三萬三百五十五鄉六十元和戶四千一百一十五鄉五十

禹貢徐州之域春秋時屬魯又為徐子之國後為楚所滅秦為泗水郡地漢興改泗水為沛郡武帝分置臨淮郡後漢下邳太守理此自晉迄後魏並為宿豫縣後魏於此置東徐州周宣帝大象二年改為泗州隋大業三年改為下邳武德四年復為泗州開元二十三年自宿遷縣移於今理

州境東西三百八十五里  
南北三百七十九里

八到西北至上都二千三百二十里  
西北至東都一千四百七十里  
東南陸行至揚州二百七十三里  
東水路至楚州二百二十里

西南至濠州二百一十里  
西北至埭橋四百二十里

貢賦開元貢麻細貨布  
賦絹布

管縣五 臨淮 宿遷 徐城 漣水 下邳

臨淮縣緊郭下本漢徐縣地長安四年分徐城南界兩鄉於沙塾

村置臨淮縣南臨淮水西枕汴河開元二十三年自宿遷移於今理

宿遷縣上南至州春秋時宋人遷宿之地至漢為公猶縣屬

臨淮郡晉立宿豫縣隋開皇三年屬泗州寶應元年以犯代宗廟諱改為宿遷縣

淮水入縣境南與楚州山陽縣分中流為界

舊州城梁將張惠紹北伐軍所次憑固斯城塹其羅城引水環之今城在泗水之中

下相故城在縣西北七十里秦故縣也項羽卽下相人也應劭曰相水出沛國故曰下相

魯肅廟在縣東南一里肅臨淮人後人爲之立廟

徐城縣

中東至州五十里

本徐子國也周穆王末徐君偃好行仁義視

物如傷東夷歸之者四十餘國周穆王聞徐君威德日遠乘八駿馬使造父御之發楚師襲其不備大破之殺偃王其子遂北徙彭城原東山之下百姓歸之號曰徐山按山今在下邳縣界楚漢之際項羽置東陽郡漢誅英布置徐縣屬臨淮郡後漢以臨淮郡合於東海明帝又分東海爲下邳國理於此晉太康三年復置徐縣屬臨淮郡梁於此置高平郡及高平縣隋開皇十八年改爲徐城縣屬泗州理大徐城大業四年移於今理

淮水西南自虹縣界流入

永泰湖縣南二里周迴二百六十三里其中多魚尤出朱衣鮒

大徐城在縣北三十里

徐君墓在縣北三十二里季札掛劍處

漣水縣

上西北至州一百六十里

本漢朐猶縣之地後漢爲徐縣之地晉

爲宿遷縣之地宋明帝於此置東海郡又於城北置襄賁縣屬焉後魏改爲海安郡隋開皇三年廢郡以縣屬海州五年改襄賁爲漣水縣因縣界有漣水故名武德四年置漣州縣屬焉貞觀元年廢漣州縣屬泗州海水在縣東北一百四里淮水西南自宿遷縣界流入

沐水俗名漣水西南自海州沐陽縣界流入

碩濩湖在縣北一百十六里與海州朐山縣中分爲界

下邳縣上東南至州一百七十五里本夏時邳國後屬薛左傳薛之祖奚仲

遷于邳是也春秋併於宋戰國時屬楚後屬齊至秦曰下邳縣

漢屬東海郡魏志曹公征呂布於下邳生擒布令東中郎將鎮

下邳宋改為下邳縣屬東徐州周改東徐為邳州隋省邳州以

縣屬泗州

嶧陽山在縣西六里

泗水西自彭城縣界流入

淮水自縣西流入去縣六十里

沂水經縣北分為二水一水於城北西南入泗一水經城東屈

曲從縣南亦注泗謂之小沂水水上有橋昔張子房遇黃石公

於圯上卽此處也南人謂橋為圯

故邾城在縣東北一百五十里古邾子國孔子問官於邾子卽

此地也

縣理城古邳國城也魏武帝征呂布於下邳決泗水引沂水以

灌其城卽此處也按下邳城有三重大城周迴一十二里半中

城周四里呂布所守也魏武帝擒布於白門卽大城之門也小

城累塼堅峻周二里許西南又有一小城周三百七十步征虜

將軍石崇所築也

石鼈屯晉穆帝升平初荀羨為北部都尉鎮下邳起田於東陽

之石鼈卽臨津郡界公私利之北齊廢帝乾明中尙書左丞蘇珍之

又議修石鼈等屯歲收數十萬石自是淮南軍防糧儲充足

濠州鍾離開元戶二萬五百五十二鄉四十一

禹貢揚州之域春秋時為鍾離子之國後為吳楚所爭之地左

傳楚子為舟師以略吳疆滅鍾離又史記楚平王時鍾離人與

吳邊邑卑梁小童爭桑二邑交相攻滅秦并天下屬九江郡漢置鍾離縣復隸九江郡晉立為鍾離郡宋因之宋明帝失淮北地復立徐州於此後廢帝改號北徐州梁因之以昌義之為北徐州刺史鎮鍾離魏中山王元英將軍楊大眼率眾數十萬來寇鍾離城北阻淮水魏人於州東邵陽洲作浮橋晝夜攻城分番相代義之善射每彎弓所向莫不應弦而倒一日戰數十合魏軍死者與城中平會高祖遣曹景宗韋叡率眾二十萬來救魏軍大敗英與大眼脫身而走因輕騎追至洛口而還州後入高齊文宣帝改為西楚州隋開皇三年改為濠州因水為名大業三年改為鍾離郡南北朝皆為重鎮隋亂陷賊武德五年杜伏威附改為濠州按濠州本屬淮南與壽陽阻淮帶山為淮南之險貞元元年竇參為相於是越淮割地隸屬徐州及徐州節度使張建封死子愔為本軍所立常挫王師其時朝廷幾失淮南之地蓋參不學無術昧於疆理之制所由致也自貞元以後州西渦口對岸置兩城刺史常帶兩城使以守其要濠字中間誤去水元和三年又加水焉

州境

東西二百六十里  
南北一百八十一里

八到

北至上都取虹縣路二千三百七十五里  
西北至東都一千五百一十里  
東北至楚州盱眙縣二百二十里從縣至楚州一百九十里

西南至壽州二百二十里  
東南至滁州二百三十里  
南至廬州三百三十里  
東北至泗州二百二十里  
西北至徐州四百五十里

貢賦

開元貢賦

官純

絹

布

管縣三

鍾離

定遠

招義

河南道五

鍾離縣

上郭下

本漢舊縣屬九江郡至晉屬淮南郡安帝時因東郡燕縣流入鍾離者於此置燕縣至高齊復爲鍾離縣

塗山在縣西九十五里

淮水西南自壽州界流入

西濠水出縣西南莫耶山北入淮

東濠水出縣南濠塘山東北入淮

當塗縣故城本塗山氏國在縣西南一百一十七里禹娶於塗山卽此也

荆山堰在郡城西一百二十二里梁天監十三年魏降人王足陳計於武帝求堰淮水以灌壽陽引北方童謠曰荆山爲上格浮山爲下格潼泡爲激溝并灌鉅野澤帝遂發徐陽人率二十戶取五丁以築之令太子右衛率康絢左衛將軍昌義之護作令戰士二十萬人於鍾離城南起浮山堰北抵巉石至十四年四月堰將合淮水漂度輒復決潰或言江淮多蛟龍其性惡鐵於是引東西二冶故鐵器大則釜鬲小則鑊鉏數千萬斤沈於堰所猶不合緣淮百里內木石皆盡負者肩上皆穿士卒死者十七八十五年四月堰乃成壽陽城戍移頓於八公山淮水清人之墳墓皆歷歷見於水底或謂紂曰四瀆者天地所以節宣其氣不宜久塞旣而昏霧三日霧解而堰決殺數萬人其聲若雷聞於三百里水中怪物隨流而下或人頭魚身龍形馬首殊類詭怪不可勝言

莊周臺在縣南七里濠水經其前莊子與惠子觀魚之所又曰

觀魚臺

定遠縣

上州一百里

北至

本漢東城縣地屬九江郡梁武帝天監初置

屬定遠郡高齊改爲大安郡隋仁壽元年廢郡改定遠縣爲臨濠縣屬濠州國朝復爲定遠縣

洛水經縣西四十里

陰陵縣故城在縣西北六十五里本漢縣也項羽敗於垓下將麾下八百騎潰圍南走灌嬰追羽至陰陵羽迷失道問田父田父給曰左左乃陷大澤以故漢兵及之

東城縣故城在縣東南五十里項羽自陰陵至此尙有二十八騎南走至烏江亭灌嬰等追羽楊喜斬羽於東城卽此地也

招義縣上西至州一百四十里本漢淮陵縣屬臨淮郡後漢屬下邳郡宋

孝武帝自淮北徙睢陵縣改爲池南縣陳爲招義縣隋大業元年爲化明縣屬濠州武德七年更名招義縣

淮水西自鍾離縣界流入

浮山堰在縣西北六十里梁天監十三年與荆山堰同時修築

蔡州緊汝南開元戶五萬一千二百一十鄉一百七元和戶一萬二千六百六十三

今爲蔡州節度使理所

管州三 蔡州 申州 光州

縣二十

古豫州之域春秋時爲蔡江黃道柏胡蓼沈頓項息房呂十三國之地七國時屬魏秦并天下爲三川河東南陽潁川碭泗水薛七郡之地漢立汝南郡領二十七縣理平輿宋元嘉中後魏太武帝率兵圍汝南郡守陳憲守拒四十餘日魏人積屍與城齊不拔而退宋文帝又於懸瓠城置司州其後太武帝收河南地獻文帝改司州爲豫州周大象二年改爲舒州隋文帝改爲豫州移入懸瓠城今理是也仁壽四年改爲濠州大業二年改

蔡州三年罷州為汝南郡武德四年復置豫州寶應元年以避代宗廟諱復改為蔡州

州境東西四百一十七里南北五百一十三里

八到西北至上都一千四百三十里西北至東都六百二十里南至申州之百五十里西至唐州二百一十里東北至陳州二百二十里北至潁州三百六十里東南至光州三百里

貢賦開元貢 龜甲 雙鴻 鵠 綾 長安四年改為四窠雲綾 賦 綾 縣

管縣十二 汝陽 汝南 平輿 吳房 西平 朗山

新息 眞陽 上蔡 新蔡 襄信 鄆城

汝陽縣望郭下本漢舊縣也屬汝南郡晉屬汝南國宋屬汝陽郡

隋開皇二年罷郡縣屬豫州仁壽四年改豫州為濠州以縣屬焉大業二年又移於今理屬蔡州

汝水經縣西南二里

州理城古懸瓠城也汝水屈曲形若垂瓠故城取名焉

平輿故城漢縣也古沈子國在縣東北六十里

鴻郟陂在縣東一十里漢成帝時陂溢為害翟方進為丞相以為決去陂水其地肥美省隄防之費遂奏罷之王莽時嘗枯旱郡人追怨方進童謠曰壞陂誰翟子威飯我豆食羹芋魁反乎覆陂當復誰云者兩黃鵠及建武中太守鄧晨使許陽為都水掾令復鴻郟陂陽曰昔成帝夢上天天帝怒曰何故壞我濯龍池於是乃因高下形勢起塘四百餘里數年乃立今廢

汝南縣關

平輿縣中西至州六十二里本漢平輿縣地屬汝南郡高齊廢隋大業

二年重置十三年陷王世充置輿州管平輿一縣武德中屬蔡州貞觀元年廢天授二年重置

汝水在縣南四十二里

葛陂在縣東北四十里周迴三十里費長房投杖成龍處

吳房縣上東南至州九十里本漢舊縣屬汝南郡後魏置襄城郡仍立

遂寧縣以屬焉隋改爲濯陽縣大業二年改爲吳房縣

西平縣上東南至州一百五十里本漢舊縣屬汝南郡後魏置卽春秋時

柏國也古韓地之分蘇秦說韓王曰韓有劍戟出於棠谿今此

縣西界有棠谿村是也縣又有龍泉水可以淬刀劍自漢至後

魏皆爲西平縣地隋末廢天授三年復置

朗山縣上東北至州九十一里本漢安昌縣地屬汝南郡東漢省後魏太

平眞君二年於朗陵故城復置隋開皇三年移於今理屬豫州

十六年改爲朗山縣

朗陵山一名大朗山在縣西北三十里

淮水經縣理南去縣一百二十里

道城古道國也在縣東北二十里

朗陵故城漢縣也在縣西南三十五里晉何曾所封之邑也

四望故城在縣東南七十里後魏太和十一年豫州刺史王肅

於四望陂南築之以禦梁梁太清二年豫州刺史羊鴟仁以二

魏交逼糧運懸斷乃棄懸瓠歸於義陽上表曰臣輒率所領縮

還舊鎮仍留夏紹等停四望城防備卽此城也

新息縣上西北至州二百里本息侯國爲楚所滅漢以爲新息縣屬汝

南郡周武帝於此置息州領此縣隋大業二年州廢改屬豫州

武德四年於此重置息州貞觀元年廢以縣屬豫州

淮水自西流入經縣南去縣五里

汝水自西流入經縣北去縣八十里

王梁渠在縣西北五十里隋仁壽中修築開元中縣令薛務更加疏導兩岸通官陂一十六所利田三千餘頃

珉玉坑在古息城東南五步周迴一百八十步深三尺其玉顏色潔白堪爲器物隋朝官采用貞觀中亦令采取其後爲淮水所沒開元中淮水東移珉坑重出其玉溫潤倍勝昔時蔡州至今以爲厥貢之首

賈君祠在縣北一里名彪字偉節後漢時爲新息長時小民多不養子彪嚴其制所活數千僉曰賈父後爲立祠

新息故城在縣西南一十里

真陽縣

中

北至

本漢慎陽縣地屬汝南郡晉屬汝南國後魏

改爲真陽縣高齊改爲保城縣隋開皇十六年改置眞巨縣大業二年復爲真陽縣因慎水爲名也

淮水經縣南去縣八十里

慎水出縣西南二十里

上蔡縣

上

南至

本漢舊縣也古蔡國晉上蔡縣屬汝南國後

魏神龜三年於此置臨蔡縣高齊廢隋文帝開皇十二年移於今理爲上蔡縣

蔡岡在縣東一十里周迴五十里

汝水西去縣一十五里

新蔡縣

上

西北至州

本漢舊縣古呂國也漢屬汝南郡晉屬

汝陰郡宋屬新蔡郡東魏孝靜帝於此置蔡州隋開皇十六年於此置舒州領廣寧縣仁壽二年改縣爲汝北大業二年改爲

新蔡縣屬蔡州

汝水經縣南去縣二里

襄信縣中 西北至州 一百八十里本漢鄆縣之地後漢分立襄信縣屬汝

南郡晉屬汝陰郡宋改為襄信縣隋大業二年改襄信縣屬蔡

州

淮水經縣南去縣七十五里

汝水經縣東北去縣五十五里

白亭在縣東南四十二里左傳楚白公勝所封之地

鄆城縣緊 東南至州 一百八十里本漢縣七國時魏之下邑史記楚昭陽

伐魏取鄆兩漢以為縣屬潁川郡光武謂賈復曰鄆最大宛次

之復曰臣請擊鄆帝執復手曰執金吾擊鄆吾復何憂謂此城

也宋元嘉二年將軍劉緬說曰鄆城有百年之福若北朝保之

未可敵也遂遣將軍殷祖焚其倉儲高齊於今縣置臨潁郡隋

開皇三年廢五年又於廢郡城中置鄆城縣屬許州武德四年

於此置道州貞觀元年廢以縣屬豫州

汝水經縣西北去縣七十八里

大澗水上承汝水自襄城至岐額城分流南為汝水北為澗水

小澗水縣西北六十里至縣合為大澗水

邵陵故城在縣東四十五里春秋齊桓公帥諸侯之師盟于召

陵即此處也漢置邵陵縣屬汝南郡隋廢入鄆城

征羌故城在縣東南七十五里本秦安陵縣建武十二年來歙

征西羌有功故改名以封之

申州中 義陽本屬淮南道貞元已後隸蔡州節度使

開元戶二萬一千二十 鄉四十二  
元和戶六百一十四 鄉二十一

禹貢荊州之域又古申國也鄭武公娶于申曰武姜在周為侯伯後為楚所滅秦并天下屬南陽郡魏文帝分置義陽縣自後省置不常宋元嘉末於此立司州自後入後魏為郢州入梁為司州周武帝平齊改為申州隋大業二年改為義州武德四年

復置申州

州境

東西一百七十八里

八到

西北至上都一千七百一十里

東北至光州二百六十里

南至安州二百六十里

西北至唐州二百六十里

西南至隨州二百三十里

北至蔡州二百八十里

貢賦

開元貢葛十四匹

賦布紵縣絹

管縣三

義陽

鍾山

羅山

義陽縣

郭下

本漢平氏縣義陽鄉之地也魏文帝分平氏立義

陽縣江左省義陽縣地入平春縣晉孝武帝改平春曰平陽隋

開皇三年改平陽為義陽縣屬申州大業二年改屬義州皇朝

復屬申州

淮水西自唐州桐柏縣界流入東北經縣去縣三十七里

故曹城在縣東三十八里梁將曹景宗將兵侵魏所築

故平靖關城在縣南七十六里舊有此關不知何代創立按義

陽有三關之塞此其一也武陽黃峴二關在安州應山縣界長

老云此關因山為障不營濠隍故名平靖

鍾山縣

上西至

本漢鄆縣也屬江夏郡宋永初中屬義陽郡

高齊於此置齊安郡後改為萬歲郡隋開皇三年罷郡為齊安

縣仍屬申州四年以近鍾山改齊安為鍾山縣

淮水經縣北四十里

澀水出縣南霸山去縣七十五里山石之間波流塞澀因以為名

石城在縣西南二十一里石城山上本晉義陽縣所理

羅山縣上西南至州一百一十里本漢鄆縣地梁武帝置西汝南郡於此

隋開皇三年併入鍾山十六年於鍾山析置羅山縣屬申州武

德四年置南羅州領羅山一縣八年州廢以縣屬申州

羅山在縣西南九里

淮水經縣北去縣二十里

光州中本屬淮南道貞元已後隸蔡州節度使

開元戶二萬九千六百九十五 鄉六十一 元和戶一千九百九十 鄉六十二

禹貢揚州之域春秋時弦國之地魯僖公五年楚人滅弦弦子

奔黃在秦屬九江郡在漢為西陽屬江夏晉安帝立光城縣理

於此梁末於縣置光州隋大業二年罷州為弋陽郡武德三年

改為光州總管府貞觀元年為光州都督府太極元年自光山

縣移於今理

州境東西四百四十三里 南北二百三十五里

八到西北至上都一千七百三十里 西北至東都九百二十里 東北至壽州四百三十里 西南至大別山三百里 西南至申州二百六十里 西北至蔡州三百里

貢賦開元貢葛十匹 生石斛六十斤 賦絕絹

管縣五 定城 殷城 固始 光山 仙居

定城縣上本漢弋陽縣屬汝南郡自漢至蕭齊常為弋陽城

武德三年置弦州領定城一縣貞觀元年省定城屬光州

淮水北去縣六十七里

黃國故城在縣西十二里春秋時黃國後為楚所滅

殷城縣中北至州一百二十里本漢期思縣地屬汝南郡宋僑立苞信縣

於此梁以苞信縣屬義州隋開皇四年改苞信縣為殷城縣屬

弋陽郡武德三年重置義州以縣屬光州

澮水在縣西五里

定城關在縣南四十里高齊以南迫陳境因置此關隋廢

温湯在縣南山中其湯綠色

固始縣上西南至州一百五十五里本漢封蓼侯之地春秋時蓼國楚并之

今縣城是也自東晉已後蓼縣省宋明帝失淮北地乃於此僑

立新蔡郡領固始一縣隋開皇七年改屬義州大業三年廢義

州屬弋陽郡

淮水經縣北八十里

茹陂在縣東南四十八里建安中劉馥為揚州刺史興築以水

溉田

孫叔敖祠在縣西北隅七十五里

光山縣上北至州三十里本漢西陽縣地屬江夏郡魏屬弋陽郡宋孝

武帝大明初於此立光城縣隋開皇三年廢入樂安縣十八年

又置光山縣

光山一名弋山在縣西北八十里

淮水經縣北七十里

木陵故關在縣南一百三十二里齊陳二境齊置此關以為禁

防周因不改隋開皇九年平陳後廢

仙居縣中東至州一百里本漢軹縣春秋時茲國楚滅之漢以為縣屬

元和县志卷九  
江夏郡至宋分立樂安縣天寶元年改為仙居縣縣西有仙居山因以為名

谷水在縣北九里

軟縣故城在縣北四十里春秋時莒國之都也

仙堂六陂在縣西南十一里梁武帝大同元年百姓堰谷水為

六陂以溉稻田

元和郡縣圖志卷第九終

元和郡縣圖志卷第十

唐 李吉甫 撰

河南道六

淄青節度使 鄆州 兗州 青州 齊州

鄆州 東平 開元戶三萬三千三百八十九 鄉六十二

大都督府 元和戶 今為淄青節度使理所

管州十二 鄆州 兗州 青州 齊州 曹州 濮州

密州 海州 沂州 萊州 淄州 登州

縣七十三

禹貢兗州之域春秋時屬宋即魯附庸須句音國太昊之後風

姓左傳公伐邾取須句戰國時其地屬魏秦為薛郡地在漢為

東平國屬兗州後漢封皇子蒼是為憲王宋及後魏並為東平

郡周宣帝於此置魯州尋廢隋分兗州萬安縣置鄆州大業三年罷州為東平郡隋亂陷賊武德五年討平徐圓朗於今鄆城縣置鄆州為總管府本理鄆城貞觀八年以下溼移理須昌貞

元三年昇為都督府

州境

東西一百八十七里南北二百六十四里

八到

西南至上都一千八百二十里西南至東都九百六十五里東北至齊州二百八十里東南至兗州一百九十里西南至曹州三百三十里北渡河至博州一百八十里

貢賦

開元貢絹十五匹

管縣十

東平

須昌

陽穀

壽張

盧

東阿

鄆城

鉅野

平陰

中都

東平縣

望古宿國左傳曰公及宋人盟于宿是也兩漢為無

鹽地後齊於此置須昌縣屬東平郡縣理無鹽城隋別置須昌

縣屬鄆州改須昌縣為宿城縣貞元三年移於州理改為東平

縣

須昌縣

望

本漢舊縣屬東平故須句國按此前須昌縣在今

縣東南三十二里須昌故城是也隋改須昌為宿城縣更立須

昌縣於今理屬鄆州縣在州南四十五步

濟水南自鄆城縣界流入去縣西二里

州理故須句城左傳任宿須句顓臾皆風姓也注曰須句雖別

國而削弱不能自通為魯私屬若顓臾之比也

無鹽故城在縣東三十六里古宿國也列女傳曰無鹽有醜女

名宿瘤齊宣王善之立為夫人即此縣女也

清水石橋在縣西三里隋仁壽元年造石作華巧與趙州石橋

相埒長四千五百尺

東平思王宇墓在縣東四十九里漢東平思王宇宣帝子後薨葬於此其冢松柏皆西靡王奢侈生葬所愛幸者守冢者嘗聞號呼數年後乃不復聞聲

陽穀縣

上東南至州七十五里

本漢須昌縣地隋於此置陽穀縣取東阿

縣界陽穀亭為名也屬濟州天寶十三年濟州為河所陷沒以縣屬鄆州

黃河在縣北十二里

故伏城在縣東南二里蓋伏生所居因名之

壽張縣

緊東北至州四十五里

本漢壽良縣也屬東郡後漢光武以叔父

名良改曰壽張屬東平國隋開皇三年罷郡屬濟州十六年割屬鄆州武德四年屬壽州五年廢壽州屬鄆州

梁山在縣南三十五里漢書曰孝王北獵梁山是也

壽州故城在縣東南十五里隋末百姓築以為堡武德四年於此置壽州

呂母堞在縣東南三十五里後漢東海呂母合眾於此兗州人

謂城實中曰堞

音直加反

盧縣

緊東南至州一百里

本漢舊縣也屬泰山郡都尉理之濟北王所

都後漢盧縣屬濟北國宋屬濟北郡隋開皇三年罷郡縣屬濟

州大業三年復為濟北郡武德四年討平王世充復為濟州按

濟州理碣磈城

碣苦高反磈音敖

本秦東郡之在平縣地其城西臨黃

河晉末為河水所毀移理河北博州界事具博州宋元嘉二十一年寧朔將軍王玄謨前鋒入河北平碣磈立戍守之都督劉義恭以沙城不堪守召玄謨毀城而還後更城之後魏略得河南

置鎮守秦常八年於此置濟州至天寶十三載州爲河所陷廢  
碣礮津在縣北一里後魏於此置關名濟州關隋末廢

劉公橋架濟水在縣東二十七里宋武帝伐燕過此造橋故俗  
呼爲劉公橋隋末廢貞觀元年重造長十二丈闊一丈二尺

東阿縣

緊南至州五十里

本漢舊縣也春秋時齊之柯地左傳曰公會

齊侯盟于柯注曰此柯今濟北東阿齊之柯邑猶祝阿也漢志  
東阿縣屬東郡都尉理晉屬濟北國隋開皇三年屬濟州天寶  
十三載濟州廢縣屬鄆州

魚山一名吾山在縣東南二十里瓠子歌曰吾山平兮巨野溢  
魚怫鬱兮迫冬日卽此山也曹子建每登此山有終焉之志及  
亡葬於山下

穀城山在縣東三十二里黃石公出一編書與張良曰後十三  
年孺子見我濟北穀城山下黃石卽我也其處焉

東阿故城在縣西二十里漢東阿縣城也晉太康後省魏志程  
昱謂范令靳允曰曹使君智殆天所授君必固范我守東阿則  
田單之功可立謂此城也水經注曰東阿大井巨若輪深七八  
丈每歲取此井水煮膠入貢本草所謂阿膠也

陽穀亭在縣東南四十二里左傳齊桓公會諸侯於陽穀是也  
項羽墓在縣東二十七里初羽爲魯公羽死後魯猶爲楚守漢  
王示以羽首魯乃降羽死乃以公禮葬於此

鄆城縣

緊東北至州一百里

本漢壽良縣地左傳曰晉人執季文子於

莒丘還待於鄆按古鄆城卽今縣是也後漢及魏皆爲壽張縣  
地隋開皇四年改爲萬安縣十六年於此置鄆城縣貞觀八年  
移鄆州於須昌縣鄆城依舊

黎丘在縣西四十五里春秋時黎侯寓於衛因以為名黎之臣子諷其君歸國作詩曰胡為乎泥中蓋惡其卑溼也

鉅野縣望西北至州一百二十里本漢舊縣屬山陽郡鉅野澤在縣東五

里即魯西狩獲麟處武德四年於此置麟州以是獲麟之地故以為名五年廢麟州以縣屬鄆州

獲麟堆在縣東十二里春秋哀公十四年經曰西狩獲麟

大野澤一名鉅野在縣東五里南北三百里東西百餘里爾雅十藪魯有大野西狩獲麟於此澤

蚩尤墓在縣東北九里今山陽鉅野縣有蚩尤肩髀冢按黃帝殺蚩尤於涿鹿之野身體異處故別葬焉

平陰縣上西南至州一百二十里本漢肥城縣地屬泰山郡古肥子國隋

開皇十四年於今縣西北二十八里置榆山縣大業二年移於今理仍改名平陰屬濟州天寶十三載州廢縣割隸鄆州

黃河去縣十里

平陰故城在縣東北三十五里左傳曰晉侯伐齊齊侯禦諸平陰

故長城首起縣北二十九里齊湣王所築蘇代謂燕王曰齊有長城巨防足以為塞是也

陶山在縣東三十五里范蠡葬處

左丘明墓在縣東南五十五里

中都縣上西北至州一百里本魯國邑也定公以孔子為中都宰一年

四方皆則之禮記曰夫子制於中都四寸之棺五寸之槨由中都宰為司寇故城在今縣西三十九里一名殷密城至漢以其地為東平陸縣屬東平國齊高帝改平陸縣為樂平縣隋復改

樂平爲平陸縣屬兗州天寶元年改爲中都割屬鄆州今卻隸兗州

汶水北去縣二十四里又北入須昌縣界

桓水在縣西八十里晉桓温進軍北次金鄉鑿鉅野三百里以通舟運自清水入河以是桓所鑿故曰桓水亦曰桓河

兗州

魯郡

中都督府

元和戶

開元戶

六萬七千三百九十七

鄉

一百三十三

鄉

一百三十三

鄉

一百三十三

禹貢兗州之域兼得徐州之地春秋時爲魯國按武王卽位封周公於少昊之墟曲阜之地周公不就封留佐武王武王崩又相成王其子伯禽乃就封之魯自伯禽至頃公三十四君爲楚考烈王所滅六國時地屬楚秦滅楚以魯爲薛郡漢高后時更爲魯國後漢仍爲魯國兗州所理不恆獻帝初平三年移兗州理濟陰之鄆城以魏太祖曹操爲兗州牧魏仍移兗州理東郡

之廩丘晉不改永嘉之後陷於石勒北州流人南渡成帝立南兗州寄理京口宋武帝平河南又得其地置兗州後又屬魏宋文帝元嘉八年理廣陵二十八年理盱眙三十年復理廣陵隋大業元年於兗州置都督府二年改爲魯州三年改爲魯郡十三年爲賊徐圓朗所據武德五年討平圓朗改魯郡置兗州貞觀十四年改置都督府謹按禹貢導沅水東流爲濟截河南渡東與菏澤汶水會又東北入於海兗州在濟河之間因濟水發源爲名今郡理乃非其境至周置兗州始兼得今郡之地而濟水自王莽末入河同流於海則河南之地無濟水矣自後所說皆習舊名

州境

東西

三百三十一里

南北

三百五十三里

八到

西南

至上

都九百八十里

西南

至東

都九百八十里

八到

西南

至東

都九百八十里

八到

西南至宋州四百里

東至沂州三百八十里

西至曹州三百七十里

西北至鄆州一百九十里

東南至徐州三百四十里

正北微東至齊州二百三十里

貢賦

開元貢紫石英二十五兩

鏡花綾二十四匹

防風二十斤綾絹縣

管縣十一 瑕丘 金鄉 魚臺 鄒 龔丘 乾封

萊蕪 曲阜 泗水 任城 中都

瑕丘縣上郭下本漢縣屬山陽郡即魯之負瑕邑也左傳曰季康

子伐邾以邾子益來囚諸負瑕宋元嘉十三年立兗州理瑕丘

城而瑕丘無縣至隋文帝割鄒縣汶陽平原三縣界立瑕丘縣

屬兗州

洙水東去縣二十三里

泗水東自曲阜縣界流入與洙水合

淮王神通營在瑕丘故城中武德五年平賊徐圓朗屯兵之處

也又有管國公任瓌薛國公長孫順德原國公史萬寶壘列營

相次各周迴五里

堯祠在縣東南七里洙水之西

金鄉縣望東北至州一百八十里本漢東緡縣也屬山陽郡即古之緡國

城左傳曰夏桀為仍之會有緡叛之陳留風俗傳曰東緡縣者

故陽武戶牖鄉漢丞相陳平即此鄉人也後漢於今兗州任城

縣西南七十五里置金鄉縣蓋因穿山得金故曰金鄉屬山陽

郡武德四年於此置金州五年廢為戴州貞觀中廢戴州縣屬

兗州

昌邑故城在縣西北四十二里其中城周十餘里外城周三十

餘里中有鐵柱出地數尺漢景帝三年吳楚趙膠西濟南菑川

膠東七國俱反天子命條侯周亞夫將三十六將軍擊吳楚亞夫至淮陽問父客鄧都尉策安出客曰莫若引兵東北壁昌邑以梁委吳將軍深溝高壘使輕兵絕淮泗口塞吳餉道吳梁相弊乃以全制其極破吳必矣條侯從之吳楚以正月起三月皆破滅卽此城也

魚臺縣

上東北至州一百九十里

本漢方與縣屬山陽郡高齊文宣帝廢

隋開皇十六年復置方與縣屬戴州貞觀十七年廢戴州縣屬兗州寶應元年改爲魚臺縣因縣北有魯君觀魚臺故名縣理城卽漢方與城也

菏水卽濟水也一名五丈溝西自金鄉縣界流入去縣十里又東南流合泗水泗水東北自任城縣界流入經縣東與菏水合又東流入徐州沛縣界

觀魚臺卽武唐亭也在縣北十三里春秋隱公五年公矢魚於棠是也

泰山府君祠在縣西十二里

鄒縣上本漢騶縣地故邾國魯之附庸魯穆公改邾爲鄒因鄒山以爲名隋大業二年改兗州爲魯州三年罷魯州爲魯郡縣皆屬焉武德五年罷縣屬兗州按邾國之地陸終之子曹姓所封卽今鄒縣是也今黃州地亦爲陸終之後所封蓋陸終有六子各爲國也

嶧山一名鄒山在縣南二十二里禹貢曰嶧陽孤桐卽此也秦始皇二十六年觀禮於魯刻石於嶧山晉建武初兗州寄理山上洛陽傾覆郗鑒獲歸州鄉人士並宗附之遂共推鑒爲主與千餘家避難於嶧山中宗假鑒龍驤將軍兗州刺史鎮鄒山後

爲石勒所侵逼鑿率文武自嶧山奔下邳

嶧山在縣東南三十八里詩曰保有嶧嶧遂荒徐宅卽此山也

龔丘縣

中南至州五十里

本漢寧陽縣之地屬泰山郡後漢改屬東平

國高齊文宣帝移置平原縣於漢寧陽縣城北十七里今縣理也隋以此縣與德州平原縣同名以縣東南二十里有龔丘城遂改爲龔丘縣屬兗州

青石山在縣西三十里後魏有青石山祠卽謂此也其山都是一大石耳發地傑立高四十餘丈周迴三里有石池二所東西行列有類人工冬夏澄清初無耗溢祈雨輒應故今古祀之故汶陽城在縣東北五十四里其城側土田沃壤故魯號汶陽之田謂此地也

乾封縣

上西南至州一百六十里

本齊之博邑延陵季子適齊子死葬於

嬴博之間至漢武帝封禪分嬴博二縣立奉高縣以奉泰山之祀後魏改博縣爲博平隋開皇十七年改博平爲博城縣乾封元年高宗封岳析長安以置乾封長安元年廢乃於岱山下改博城縣爲乾封縣屬兗州

泰山一曰岱宗在縣西北三十里

社首山在縣西北二十六里

高里山亦曰蒿里山在縣西北二十五里

徂徠山亦曰尤來山詩曰徂徠之松後漢赤眉渠帥樊崇保守此山自號尤來山老

汶水源出縣東北原山西南流經縣理南去縣三里又有北汶嬴汶柴汶牟汶浯汶述征記曰泰山郡水皆名汶按今縣界凡有五汶皆源別而流同也

岳廟在縣西北三十里泰山之南郡國志廟前有柏樹漢武帝所種赤蒼賊斫一樹見血乃止有嶽令掌之開元十三年冬玄宗登封泰山登封之夕凝氛昏晦迅風激烈皇帝出齋宮露立以請及明清霽旗旛不搖事畢至山下日光重輪又抱戴明耀五色千官稱賀其日大赦以靈岳昭感封泰山神爲天齊王萊蕪縣中西南至州二百六十里本漢縣也故城在今淄州東南六十里齊靈公滅萊萊人流播邑落荒蕪故曰萊蕪後漢范史雲曾爲此縣長百姓歌其清儉曰甌中生塵范史雲釜中生魚范萊蕪至晉廢後魏移古羸縣於此貞觀元年廢入博城縣至長安四年又於廢羸縣置萊蕪縣取漢舊名也屬兗州

韶山在縣西北二十里其山出鐵漢置鐵官至今鼓鑄不絕

曲阜縣上西北至州四十五里本漢魯縣卽春秋時魯國伯禽所都其地

卽古炎帝之墟也自後或爲魯國或爲魯郡而縣屬焉高齊文宣帝省魯郡仍於魯城置任城郡隋開皇三年罷郡仍移汶陽縣理此屬兗州十六年改汶陽縣爲曲阜縣

防山在縣東二十五里禮記曰孔子旣得合葬於防卽此是也壽丘在縣東北六里皇甫謐以爲黃帝生於壽丘在魯城東門之北

曲阜在縣理魯城中委曲長七八里今按季子臺及大庭氏庫及縣理城並在其上

洙泗二水東自泗水縣界流入又西南流經縣北分爲二流水側有一城爲二水之分會也南爲泗水北爲洙水二水之間卽夫子領徒之所居也

沂水亦名雩水源出縣東南八里

珂澤俗名連泉澤在縣東九里魯僖公牧馬之地詩曰駟駟牡馬在珂之野是也

闕里在縣西南三里魯城中北去洙水百餘步

兩觀在縣東南五十步定公二年雉門及兩觀災卽家語孔子戮少正卯之處

豐相圃在縣西三里魯城中

孔子墓在縣西北三里魯城之北

靈光殿魯王所造在魯城內案文選漢景帝子名餘封爲魯王好理宮室而建此殿遭王莽亂宮室被焚建章皆墮壞而靈光殿巋然獨存

泗水縣上西南至漢卞縣之地卽春秋之虛朶地隋分汝陽

縣於此城置泗水縣屬兗州

尼丘山在縣南五十里叔梁紇禱尼丘山而生孔子

梁父山在縣北八十里西接徂徠山封禪書曰古者封泰山禪

梁父七十二家

龜山在縣東北七十五里詩曰奄有龜蒙定公十年左傳曰齊人來歸龜陰之田是也

泗水源出縣東陪尾山其源有四四泉俱導因以爲名

盜泉源出縣東北高徑山之陰淮南子曰孔子不飲盜泉之水漏澤在縣東七十里此澤漏穴有五皆方丈餘深二丈以上其澤每春夏積水秋冬漏竭將漏之時居人知之不過三日漏水俱盡先以竹木作薄籬圍之水族山積也

菟裘故城在縣北五十五里魯隱公曰使營菟裘吾將老焉

任城縣緊東至州本漢舊縣屬東平國古任國太昊之後風

七十六里

河南道

七

姓也僖公二十一年左傳曰任宿須句皆風姓也注曰任今任城縣也魏志曰文帝封鄆陵侯彰為任城王齊天保七年移高平郡於此任城縣屬焉隋開皇三年罷高平郡屬兗州

承注山在縣東南七十六里女媧生處按今山下有女媧廟

桓公溝源出縣理西四十里萌山之下宋武帝北征記曰桓公宣武以太和四年率眾平趙魏時遣冠軍將軍毛彪生鑿此溝號曰桓公溝於今四十九年矣溝已填塞公遣寧朔將軍朱超更鑿石通之

女媧陵在縣東南三十九里

魏王祭墓在縣南五十二里

青州北海開元戶五萬五千一百三十一鄉一百二

古少昊氏之墟禹貢青州之地舜時以青州越海遼遠分為營

州禹復置九州武王克商封師尚父於齊營丘周成王少時命

太公曰東至於海西至於河南至於穆陵北至於無棣穆陵山在今琅

邪沂水縣界無棣今景城郡屬縣也五侯九伯實得征之至二十九代為田和所

篡和子孫強盛與燕趙韓魏楚俱稱王五世至建為秦所滅分

齊地置齊琅邪二郡漢元年冬更為臨淄項羽立田都為王都

臨淄其年四月田榮擊都都走楚榮自立為王十二月楚擊榮

榮走平原項羽立田假為王榮弟橫擊假假走楚楚立田廣為

王三年韓信殺廣漢立韓信為齊王五年信徙王楚六年以膠

東等七十餘城封皇子肥為齊王傳國至厲王昌國除武帝復

封次子闕為齊王後國除遂以齊為郡領縣十二理臨淄後漢

改齊郡為齊國曹魏明帝封子芳為齊王尋即帝位晉武帝以

弟攸為王子冏嗣永嘉末陷於石勒其後南燕慕容德建都於

此至慕容超宋武帝伐克之以沈文秀為青州刺史守東陽城為魏將慕容白曜所陷遂入後魏隋大業三年罷州為北海郡領縣十隋亂陷賊武德二年海岱平定改為青州置總管府

州境 東西二百七十里 南北三百四十四里

八到 西南至上都二千四百五里 西南至東都一千五百五十五里 東北至萊州三百四十五里 南至沂州四百五十里 東至密州三百三十里 西北至棗州三百二十里

貢賦 開元貢 賦 縣 絹 棗 糖 海物

管縣七 益都 臨淄 千乘 臨朐 北海 壽光

博昌

益都縣 望郭下 本漢廣固縣地魏於今壽光縣南十里益都城置

益都縣屬齊國宋及後魏屬齊郡隋開皇三年罷郡縣屬青州

淄水西去縣五十五里

廣固城在縣西四里晉永嘉五年東萊牟平人曹嶷為刺史所築有大澗甚廣固故謂之廣固初南燕慕容德議所都尚書潘聰曰青齊沃壤號東秦土方二千里四塞之固負海之饒可謂用武之國廣固者曹嶷之所營山川阻峻足為帝王之都德從之及義熙五年宋武帝征慕容超於廣固也城側有五龍口險阻難攻兵力疲弊河間人玄文說裕曰昔趙攻曹嶷望風者以為澗水帶城非可攻拔若塞五龍口城當必陷石季龍從之嶷請降後五日大雨震雷復開徙舟嶧陽再閱之亂段龕據之慕容恪攻圍數月不剋又塞五龍口龕遂降後無幾又震開之今舊基猶存宜謹修築裕從之超及城中男女皆患腳弱病者大半超遂出奔為晉所擒

臨淄縣

緊南至州四十里

古營丘之地呂望所封齊之都也太公後二

十九代康公爲田和所滅和立爲齊侯後稱王五代至王建爲秦所滅秦立爲縣城臨淄水故曰臨淄自漢至後魏並屬齊郡高齊省隋開皇十六年移高陽縣理此改爲臨淄縣屬青州社山在縣西北二十五里一名愚公山有愚公谷在山之陰牛山在縣南二十五里昔齊景公遊牛山北望而歎曰美哉國乎古而無死將何去此晏子對曰古而無死則太公丁公之樂也君何與於此哉

營丘在縣北百步外城中爾雅曰水出其前經其左曰營丘今臨淄城中有丘淄水出其前經其左故曰營丘

葵丘在縣西北二十里齊侯使連稱管至父戍葵丘卽此也

縣理卽古臨淄城也漢齊郡亦理於此蘇秦說齊王曰臨淄城中七萬戶戶不下三人卽二十一萬人又燕王謂蘇代曰吾聞齊地清濟濁河可以爲固長城巨防可以爲塞漢書田肯曰夫齊東有琅邪卽墨之饒南有泰山之固懸隔千里持戟百萬齊得十二焉此東西秦也非子弟勿王漢六年封皇子肥爲齊王盡得故齊地人能齊言者悉與之

齊雪宮故址在縣東北六里晏子春秋所謂齊侯見晏子於雪宮也

天齊池在縣東南十五里封禪書曰齊之所以爲齊者以天齊池也

齊桓公墓在縣南二十三里鼎足山上貞觀十一年詔致祭禁二十步內不令樵蘇

管仲墓在縣南二十三里

晏嬰墓在縣東北三里貞觀十一年詔十五步並禁樵蘇

千乘縣上州東南至八十里本漢舊縣也屬千乘郡有鹽官後漢和帝

永元七年改千乘郡為樂安國千乘縣仍屬焉武德二年於此

置乘州八年廢乘州千乘依舊屬青州千乘者以齊景公有馬

千駟畋於青丘今縣北有青丘縣因以為名

淄水南去縣二十八里

臨朐縣上州北至四十里本漢縣也屬齊郡東有朐山因以為名隋開

皇六年改為逢山縣屬青州取縣西逢山為名大業二年又改

為臨朐縣

朐山在縣東南二里

逢山在縣西二十二里

破車峴在縣東南三十五里按峴高七十丈周迴二十里道徑

險惡因名破車峴

北海縣緊西北至州一百三十里本漢平壽縣地屬北海郡隋開皇三年

罷郡置下密縣於廢郡中屬青州十六年又於此置濰州取界

內濰水為名大業二年廢濰州仍改下密縣為北海縣

海水在縣東北一百二十里禹貢海岱惟青州今按海東接萊

州西接壽光縣界

濰水南去縣五十五里

膠水東去縣八十五里與萊州膠水縣中分為界

公孫弘墓在縣西

壽光縣緊西南至州七十里本漢舊縣也屬北海郡後漢改屬樂安國

宋省壽光縣隋開皇六年於縣北一里博昌故城置壽光縣屬

青州武德二年屬乘州八年廢乘州還屬青州

海水在縣東北一百一十里東接北海縣界西接博昌縣界

淄澠二水西自千乘縣界流入去縣四十里

博昌縣上東南至州一百二十里本漢舊縣屬千乘郡昌水其勢平博故

曰博昌後漢以千乘郡為樂安國博昌縣仍屬焉晉宋後魏並

同高齊省移樂陵縣今縣東十二里樂陵故城理此屬樂安郡隋開皇三年

罷郡樂陵縣屬青州十六年改為博昌縣

濟水北去縣百步又東北流入海

海浦在縣東北二百八十里即濟水東流入海之處水口謂之

海浦

蒲姑故城在縣東北六十里齊舊都也

齊州齊郡上開元戶四萬九千一百五十七

禹貢兗州之域春秋及戰國時屬齊國秦併天下為齊郡漢分

齊郡立濟南國今州即濟南國之歷城縣理也景帝三年為濟

南郡理東平陵屬青州晉永嘉之後郡移理歷城即今州理是

也後為石勒所據慕容氏亦有其地義熙五年劉裕平之宋元

嘉九年分青州立冀州理歷城後魏將慕容白曜攻下歷城後

文帝改冀州為齊州與濟南郡並理隋開皇三年罷郡以所領

縣屬齊州大業三年罷州為齊郡隋末陷於寇賊武德元年海

岱平定罷郡復州

州境東西三百八十二里南北一百四十二里

八到西南至上都二千一百五里西南至東都一千二百里

東至淄州一百九十里西渡河至博州二百九十里

東北渡河至棗州三百五十里正南微西至兗州三百三十里正北微西至德州二百四十五里

貢賦

開元貢賦

絲葛絹

管縣九 厯城 全節 章丘 亭山 臨邑 臨濟

長清 豐齊 禹城

厯城縣

上郭下

古齊厯下城對厯山之下漢為厯城縣屬濟南國

晉屬濟南郡隋開皇三年罷郡縣屬齊州

華不注山一名華山在縣東北十五里齊晉戰于鞍齊敗績晉

逐之三周華不注

州理城古厯下城也左傳晉平公伐齊戰于厯漢書酈食其說

齊王田廣罷厯下軍守備韓信度平原襲破厯下因入臨淄述

征記曰厯城到營城三十里自城以東水瀾漫數十里南則迫

山實為險固也

神通寺在縣東七十里琨瑞山中苻秦時沙門竺僧朗隱居也

朗少事佛圖澄尤明氣緯隱於此谷因謂之朗公谷

全節縣

上州七十里西南至

本春秋譚國之地齊滅之漢以為東平陵

縣屬濟南郡宋省東字後魏為東陵至周省其全節縣本是隋

末土人李滿率鄉人據堡贍以家財武德二年歸國於堡置譚

州及平陵縣以滿為譚州總管貞觀元年廢譚州縣屬齊州十

七年燕亮構逆滿及男君珠固守賊平縣廢有詔重置縣改名

全節以旌其功焉

濟水在縣北四十里

巨合城在縣東南二十三里耿弇討張步守巨里即此城也

章丘縣上本漢陽丘縣也屬濟南郡高齊文宣帝天保七年自

高唐故城移高唐縣理於此隋開皇十八年以博州亦有高唐

縣改為章丘縣屬齊州取縣南章丘山為名也武德二年屬譚

州貞觀元年廢譚州又屬齊州

東陵山在縣南二十八里莊子曰盜跖死於東陵之上

龍盤山在縣東二十五里上有神跡是姜嫄所履處

長白山在縣東南三十里高二千九百丈周迴六十里

濟水西去縣十七里

縣理城即黃巾城也在濟水之南岸漢獻帝建安中黃巾賊張角之所守也

亭山縣上西北至州九十里本漢平陵縣地宋於此置衛國縣屬頓邱

郡隋開皇六年改為亭山縣屬齊郡縣東南有亭山因以為名

長白山在縣東北六十里齊記曰於陵城西二里有長白山陳

仲子夫妻所隱也

百脈水出縣東北平地水源方百餘步百泉俱出合流故名之

臨邑縣上南至州六十里本漢舊縣屬東郡至晉屬濟北國宋孝武帝

孝建二年立東魏郡理臺城以臨邑縣屬焉隋開皇三年罷郡

臨邑縣屬齊州武德二年屬譚州貞觀元年廢譚州屬齊州

黃河在縣北七十里

濟水西去縣四十里

漯水北去縣七里

鹿角關在縣西北七十里隋大業三年廢

長清縣上東北至州八十里本漢盧縣地隋開皇五年於此置鎮十四

年廢鎮長清縣屬濟州因清水為名貞觀十七年廢濟州屬齊

州

隔馬山在縣東南三十五里左傳曰晉侯伐齊齊師遁夙沙衛

殺馬於隘以塞道後因為隔馬山

黃河北去縣五十五里

濟水北去縣十里

清水西南去縣十里

清溝泊在縣西南五里東西三十里南北二十五里水族生焉

數州取給

廢四口關在縣西南五十里後魏置武德九年廢

石窰故城在縣東三十里

臨濟縣上 西南至州 一百二十里本漢管縣屬濟南郡隋開皇六年移朝

陽縣理於此屬齊郡十六年改為臨濟縣

黃河在縣北八十里

濟水在縣南二十里

豐齊縣上 東北至 州四十里本漢茌縣也取縣東北茌山為名屬泰山

郡隋大業二年省入厯城縣武德元年重置天寶元年改為豐

齊

岐陽山在縣東南五十里

濟水西去縣二十六里

祝阿故城在縣東北二里禮記曰武王克殷封皇帝之後於祝

卽此

禹城縣上 東南至州 一百五十里本漢祝阿縣春秋時齊邑漢以為縣屬

平原郡隋開皇十六年改屬齊郡天寶元年改名禹城縣以縣

西南三十里有禹息故城因而為名在州西北八十五里

元和郡縣圖志卷第十終

元和郡縣圖志卷第十一

唐 李吉甫 撰

河南道七

曹州 濮州 密州 海州 沂州 萊州 淄州

登州

曹州 濟陰 開元戶七萬三千一百六十一 鄉一百四十九

禹貢豫州之域於周又為曹國之地後屬於宋左傳哀公八年宋景公滅曹按曹國在州東北三十七里濟陰縣界故定陶城是也七國時屬齊宋為楚魏所滅三分其地齊得其濟陰東平漢為濟陰郡之地在濟水之南故以為名景帝中六年別為濟陰國宣帝甘露二年更名定陶哀帝更為濟陰郡屬兗州後魏於定陶城置西兗州周武帝改西兗州為曹州取曹國為名也

隋大業三年改爲濟陰郡隋亂陷賊武德四年平孟海公復爲

曹州

州境東西二百五十九里  
南北二百五十九里

八到西至上都一千五百二十五里  
西至東都六百六十五里

西南至汴州二百四十五里

東至兗州三百七十里

東北至鄆州三百三十里

東南至宋州一百五十里

西北至滑州二百里

貢賦開元貢 蛇牀子 葶藶  
賦 縣 絹

管縣六 濟陰 冤句 乘氏 成武 南華 考城

濟陰縣緊郭下本漢定陶縣之地屬濟陰郡隋開皇六年於此置

濟陰縣屬曹州皇朝因之

曹南山在縣東二十里詩所謂蒼兮蔚兮南山朝濟是也

汜水在縣南昔漢高祖既定天下卽位於汜水之陽張晏曰汜水在濟陰界取其汎受宏大而潤下按今汜水縣東亦有高祖卽位壇據叔孫通傳云高祖爲皇帝通於定陶就其儀在濟陰是也

荷澤在縣東北九十里故定陶城東北其地有荷山故名其澤爲荷澤禹貢曰導荷澤被孟豬

州理中城蓋古之陶丘也一名左城帝王世紀舜陶於河濱卽禹貢之陶丘今濟陰定陶西有陶丘是也爾雅曰再成爲陶丘成猶重也

古曹國在縣東北四十七里故定陶是也定陶故城堯所居也堯先居唐後居陶故曰陶唐氏史記曰曹叔振鐸者周武王弟封於曹魯哀公八年宋滅曹執曹伯陽自曹叔至伯陽凡十八

葉又范蠡相越平吳後變姓名為朱公居於陶號陶朱公亦此地也

莘仲故城在縣東南三十里蓋古之莘國也伊尹耕於莘野湯聞其賢聘以為相即此地

三醜亭古國也在縣東北四十九里湯伐桀遂伐三醜俘厥寶玉注曰三醜國名今定陶是也

冤句縣緊東至州四十七里本漢舊縣也漢初屬梁國景帝時屬濟陰郡隋開皇三年罷郡以縣屬曹州

煮棗故城在縣西北四十里漢書樊噲攻煮棗屠之是也

濟陽故城在縣西南五十里漢濟陽縣也光武以建平元年生於濟陽縣明照一室是歲有嘉禾生一莖九穗大於凡禾因名秀光武皇考為濟陽令

袁本初故城在縣北七十里袁紹所築

乘氏縣緊南至州五十四里本漢舊縣也屬濟陰郡隋開皇三年罷郡以縣屬曹州大業末年廢武德四年重置

孟海公南北二城在縣東四十五里隋末賊帥孟海公所築

成武縣緊西至州一百里本漢舊縣也屬山陽郡後漢改屬濟陰郡隋於此置戴州成武縣屬焉大業二年省戴州縣移理州城中後屬曹州武德五年於金鄉縣重置戴州縣又屬焉貞觀十七年廢戴州縣又屬曹州

故柁城在縣西北二十九里昭帝封金日磾為柁侯

南華縣上東南至州一百二十里本漢離狐縣也屬東郡舊傳初置縣在濮水南常為神狐所穿穴遂移城濮水北故曰離狐後漢屬濟陰郡魏志李典從太祖遷離狐太守然則魏時離狐郡也晉屬

濟陰郡隋開皇三年罷郡縣屬曹州天寶元年改曰南華英公李勣左僕射彭城郡公劉晏皆此縣人

濮水在縣南五里昔殷紂使師延作靡靡之樂武王伐紂師延至投濮水而死謂此水也

考城縣緊東北至州九十五里古戴國也春秋隱公十年宋人蔡人衛人

伐戴後屬宋楚滅宋改名曰穀漢以為菑縣國都城記曰縣西南有戴水今名戴陂周迴可百餘里蓋本戴國取此陂水為名也漢之興也其邑多菑年數不登故邑曰菑孝章帝柴於岱宗過菑縣詔御史曰陳留菑縣其稱不令故高祖鄙柏人之名武帝休聞喜而顯獲嘉其改菑縣為考城縣至晉屬濟陰郡高齊天保七年省考城縣移成安縣理此隋開皇十六年仍改名考城縣屬宋州武德五年改屬曹州

葵丘在縣東南一百五十步左傳齊桓公會諸侯於葵丘是也大劑陂即戴陂也在縣西南四十五里周迴八十七里與宋州襄邑縣中分為界

濮州濮陽上開元戶四萬六千九百二十一 鄉九百一十三

禹貢兗州之域春秋時為衛國地左傳齊桓公會諸侯于鄆注曰鄆衛地今東郡鄆城縣也戰國時屬齊在漢為濟陰郡之鄆城也後漢獻帝於此置兗州晉置濮陽郡後改為濮陽國封王子允為王後為郡隋開皇十六年於此置濮州大業三年廢濮州入東平郡隋末陷於寇賊武德四年討平王世充於此重置

濮州

州境東西二百三十五里南北一百三十五里

八到西南至上都一千六百五十五里西南至東都七百九十五里

東北至鄆州一百七十里  
南至曹州二百一十里

北至黃河二十里  
西南至滑州二百一十五里

貢賦 開元貢 絹二十匹 賦 絲 絹

管縣五 鄆城 雷澤 臨濮 濮陽 范

鄆城縣 緊郭下 本漢舊縣屬濟陰郡隋開皇十六年於此置濮州

鄆城縣屬焉大業三年廢濮州縣屬東平郡武德四年重置濮

州鄆城縣又隸焉

黃河北去縣二十一里

州理城在故鄆城中魏文帝以臨淄侯植為鄆城侯

雷澤縣 上西北至州九十里 本漢成陽縣古郟伯國周武王封弟季載

於郟漢以為縣屬濟陰郡隋開皇六年於此置雷澤縣因縣北

雷夏澤為名也屬濮州

歷山在縣北十六里史記曰舜耕歷山耕者讓畔

澠水沮水二源俱出縣西北平地去縣十四里

雷夏澤在縣北郭外澠沮二水會同此澤

姚墟在縣東十三里舜生於姚墟

堯母廟在縣西南四里

堯陵在縣西三里自堯即位至永嘉三年二千七百二十一年

記於碑貞觀十一年有詔禁人芻牧春秋奠醑

臨濮縣 上北至州六十里 本漢成陽縣地屬濟陰郡隋開皇十六年分

鄆城南界雷澤西界置臨濮縣屬濮州南臨濮水故以為名大

業二年廢武德四年重置

清丘在縣西三十五里

濮陽縣 上東至州八十里 本漢舊縣也古昆吾國即帝丘顓頊之墟也

昆吾卽夏諸侯爲五伯之首左傳曰狄滅衛遷於帝丘衛侯自楚丘徙濮陽縣秦置東郡理此漢仍爲東郡及濮陽縣也隋開皇十六年改屬濮州

黃河北去縣一十五里

瓠子河上承黃河漢書武帝時河決瓠子東南注鉅野通於淮泗上使汲黯鄭當時與人徒塞之輒復壞是時武安侯田蚡奉邑食鄒鄒在河北河決而南則鄒無水災乃言江河之決皆天事非易以人力塞之乃不復塞後二十餘歲歲比不登梁楚尤甚上使汲人郭昌率卒數萬人塞瓠子決河沈白馬玉璧自將軍以下皆負薪下淇園之竹以爲楗上悼功之不成乃作歌於是卒塞瓠子築宮於其上名曰宣房其後王尊爲東郡太守河水盛溢泛浸瓠子金隄尊躬率佐吏民沈白馬祀水神親執玉璧使巫策祝請以身填金隄水盛隄壞吏民皆奔走尊立不動而水漸退

范縣

上西南至州六十里

本漢舊縣屬東郡春秋時晉大夫士會之邑

也高齊廢隋開皇六年又置范縣屬濟州十六年改屬濮州

故顧城在縣東二十八里夏之顧國也詩曰韋顧旣伐昆吾夏桀注曰三國黨於桀皆爲湯所誅

密州

高密中

禹貢青州之域兼得徐州之地今州界於春秋時爲莒魯之地戰國時屬齊秦并天下屬琅邪郡漢文帝十六年分齊立膠西國都高密宣帝更名高密國後魏永安二年分青州立膠州取膠水爲名也隋開皇五年改膠州爲密州取境之密水爲名也隋亂陷賊武德五年山東底定改置密州

州境 東西三百一十六里  
南北三百九十里

八到 西至上都二千七百四十五里  
西至東都一千八百八十五里  
南至海州三百八十四里  
西南至沂州三百七十里  
西北至青州三百三十里  
東北至萊州三百四十五里  
東至大海一百六十里

貢賦 開元貢 細布 牛黃 海蛤  
賦 絕布

管縣四 諸城 高密 輔唐 莒

諸城縣 上 郭下 本漢東武縣也屬琅邪郡樂府章所謂東武吟者

也後漢屬琅邪國晉屬東莞郡後魏屬高密郡隋開皇十八年改東武為諸城縣取縣西三十里漢故諸縣城為名

琅邪山在縣東南一百四十里史記曰始皇二十六年滅齊遂登琅邪作層臺於山上謂之琅邪臺周迴二十里秦王樂之因

留三月徙黔首二萬戶於山下後十二年刊石立碑記秦功德海在縣東一百五十里

盧水出縣東南盧山水側有勝火木野火燒死其炭不灰故東方朔有謂不灰之木者也

縣理東南一百三十里濱海有鹵澤九所煮鹽今古多收其利濰水故堰在縣東北四十六里蓄以為塘方二十餘里溉水田萬頃

高密縣 上 西南至州 一百二十里 本漢舊縣也文帝十六年分齊立膠西

國封齊悼惠王子卬為膠西王都高密世祖封鄧禹為高密侯高齊文宣帝省高密縣隋開皇中復置屬密州

海在縣東南六十里

濰水在縣西南自諸城縣界流入去縣四十里昔韓信與楚將

龍且夾濰水而陣信爲萬餘囊盛沙過水引軍擊之信僞退且追北信決水且軍半不得渡遂斬龍且

膠水在縣東三十里

夷安澤在縣北二十里周迴四十里多麋鹿蒲葦

龍且城在縣西南五十五里楚將龍且所築也

鄭玄墓在縣西七十里

輔唐縣上東南至州一百二十里本漢安丘縣也屬北海郡後漢亦屬北

海國有渠丘亭故莒渠丘公所居也高齊文宣帝天保七年省

隋分昌安縣置牟山縣大業二年改牟山縣爲安丘縣取漢書

舊名也屬密州乾元二年改爲輔唐縣

牟山在縣西南十三里牟山縣取名於此

浯水堰三齊記曰昔者堰浯水南入荆水灌田數萬頃今尙有

餘堰而稻田畦畛存焉

莒縣上東北至州一百九十里故莒子國也漢爲莒縣文帝二年封朱虛

侯章爲城陽王都莒後魏亦以莒縣屬東莞郡隋開皇三年廢

郡莒縣屬莒州大業三年罷莒州以莒縣屬琅邪郡武德五年

重置莒州縣屬焉貞觀八年廢莒州以縣屬密州

濰山在縣東北八十三里濰水所出也

縣理在莒國故城中城三里並皆崇峻唯南開一門

子城方十二里郭周迴四十里

故曹公城在縣南七十二里昔魏太祖征陶謙拔五城略地東

海於此築城周迴四里

漢海曲縣在縣東一百六十里屬琅邪郡有鹽官地有東呂鄉

東呂里太公望所出也王莽末海曲縣有呂母者其子爲縣令

枉殺乃散財以招少年少年感母恩問母所欲具言之乃共起兵殺縣令其後屯結至數萬赤眉之興由此始也今東海縣有呂母國卽舊集之所也

海州 東海 開元戶二萬三千七百二十八 鄉四十

禹貢徐州之域春秋時魯國之東鄙七國時屬楚秦置三十六郡以魯爲薛郡後分薛郡爲郟郡漢改郟郡爲東海郡領三十縣理在郟縣屬徐州後漢以爲東海國封皇子彊爲王晉惠帝封高密王子越爲東海王梁武帝末年長江已北悉附後魏武定七年改青冀二州爲海州高齊文宣帝移海州理琅邪郡改琅邪郡爲胸山郡隋末喪亂臧君相竊據之武德四年君相以郡歸順改爲海州

州境 東西一百九十八里 南北二百五十七里

八到 西至上都取沂兗路二千五百五里 西至東都一千六百四十里 東南至揚州七百里 東南至泗州連水縣取官河水路三百四十里陸路二百五十里 西北至沂州二百三十里 西至徐州取下邳路五百六十里 北至密州三百八十四里 東至海二十里

貢賦 開元貢 楚布 緝 絲

管縣四 胸山、東海、沭陽、懷仁

胸山縣 上郭下 本漢胸縣也屬東海郡後周武帝建德六年改胸

山縣爲胸山郡取界內胸山爲名也隋開皇三年廢郡縣屬海

州

羽山在縣西北一百里書曰殛鯀于羽山卽此也

碩濩湖在縣南一百四十二里

龍且故城在縣南六十里

鍾離昧故城在縣南一百里項羽將鍾離昧所築昧即此縣人

東海縣上西至州水路九十里本漢贛榆縣地俗謂之鬱州亦謂之田橫

島宋明帝失淮北地乃於鬱州上僑立青州地後入魏魏改青

州為海州又於此置臨海鎮高齊廢臨海鎮周武帝復置東海

縣後遂因之

小鬲山在縣北六十里田橫弟避漢所居之山也其山三面絕

壁皆百餘仞惟東南一道略容行人

大海在縣東二十八里

贛榆故城在縣北四十九里隋末土人臧君相築

田橫國在縣北五十七里齊王田廣既死田橫乃代立為王與

灌嬰戰於贏下橫敗走與其屬五百人入居海島即此也

沭陽縣中東北至州一百六十里本漢厚丘縣地宋文帝元嘉四年於此

置縣屬南彭城郡至太清二年地入魏孝靜帝改為沭陽郡在

沭水之陽故以為名仍於郡東置懷文縣周武帝改懷文為沭

陽縣

沭水西自下邳縣界流入經縣南十步

碩濩湖在縣東八十里與朐山連水三分湖為界

懷仁縣中東南至州九十里本漢贛榆縣地梁於此置北海郡後魏改

置義唐郡隋開皇初廢郡移懷仁縣理於此改屬海州

贛榆故城一名鹽倉城在縣東北三十里漢舊縣也屬琅邪郡

沂州琅邪中開元戶二萬七千四百鄉五十五

禹貢徐州之域春秋時為齊地秦并天下置琅邪郡因琅邪山

以為名也漢因之高后立營陵侯劉澤為琅邪王文帝元年徙

澤為燕王以琅邪為郡晉武帝咸寧二年改封東海王睿為王  
王即帝位於江東是為東晉元帝元帝於郡城置發千戍以南  
軍鎮之自永嘉之後琅邪陷於胡寇成帝於丹陽江乘縣界別  
立南琅邪郡至宋武帝得河南尋又沒於後魏莊帝置北徐州  
琅邪郡屬焉周武帝改北徐州置沂州以州城東臨沂水因以  
名之大業十三年亂離郡為徐圓朗所破武德四年討平圓朗  
復置沂州

州境 東西三百二十一里  
南北四百二十九里

八到 西至上都二千二百七十五里  
西至東都一千四百一十五里  
東南至海州二百三十里  
西至兗州三百八十里  
東南至泗州下邳縣二百七十七里  
北至青州四百五十里  
西南至徐州三百五十里  
東北至密州三百七十里

西北至淄州五百三十里

貢賦 開元貢 紫石英 黃銀  
賦 絛 絹

管縣五 臨沂 沂水 費 承 新泰

臨沂縣 上郭下 本漢舊縣也屬東海郡東臨沂水故名之後漢改

屬琅邪國晉屬琅邪郡高齊省隋開皇末復置屬沂州

羽山在縣東南一百一十里與海州朐山縣分界

沂水東去縣一里

王僧辯城在縣東北五十里梁將王僧辯屯兵於此

王導故宅在縣東北三十八里

沂水縣 上州二百里 南至本漢東莞縣即春秋莒魯所爭之鄆邑也城

陽姑幕縣南有員亭即鄆也俗變其字耳後魏孝文帝於此置

新泰縣隋開皇四年改為東安縣十六年又於古蓋城別置東

安縣而此改名沂水縣

沂山在縣北一百二十四里周禮青州其鎮沂山

穆陵山在縣北一百九十里管仲曰賜我先君履南至於穆陵是也

大峴山在縣北九十里宋高祖北伐慕容超大將公孫五樓說超曰吳兵輕銳難與爭鋒宜斷大峴使不得入上策也超曰引使過峴我以鐵騎蹙之此成擒耳不從宋高祖兵遂得入初是役也或曰彼若嚴守大峴軍無所資何能自返高祖曰鮮卑性貪且愛其穀必將引我兵一入大峴吾何患焉及師過大峴高祖喜曰天贊我也遂大破之伍緝之從征記曰大峴去半城八十里直度山二十五里崕坂峭曲石徑幽危四岳三塗不是過也

靄山在縣西北二十八里出紫石英好者表裏映徹形若靄狀故名靄山今猶入貢

成平公營在縣北一百五十六里周武帝拔鄴城齊王高緯先送其母妻於青州是日緯率千騎走青州周遣大將軍成平公尉遲勤率二千騎追之擒緯於青州南之雙溝周因授以青州總管立碑紀功

費縣

上東南至州九十里

古費國也隱公元年傳曰費伯帥師城郕後

爲魯季氏之邑至漢爲費縣屬東海郡自宋至隋皆屬琅邪郡大業末爲賊潘當所破武德四年重置屬沂州

蒙山在縣西北八十里楚老萊子所耕處

東蒙山在縣西北七十五里論語曰夫顓臾昔者先王以爲東蒙主

南城縣城在縣南九十里史記齊威王使檀子守南城則楚人不敢爲寇是也

承縣上東北至州本漢之承縣春秋時鄆國也屬東海郡隋

開皇三年罷郡承縣屬徐州大業十三年縣爲山賊左君衡所破武德四年又於此置鄆州又改蘭陵縣爲承縣貞觀八年廢鄆州縣屬沂州縣西北有承水因以名焉

抱犢山在縣北六十里壁立千仞頂寬而有水此山去海三百餘里天氣澄明宛然在目昔有遁隱者抱一犢於其上墾種故以爲名山高九里周迴四十五里

蘭陵縣城在縣東六十里史記曰荀卿以儒者適楚楚春申君以爲蘭陵令因家焉

縣界有陂十三所並貞觀元年已來修立以溉田焉

新泰縣上東南至州春秋時魯平陽邑也宣公八年城平陽

晉武帝泰始中鎮南將軍羊祜此縣人也表改爲新泰縣屬泰山郡隋開皇四年屬莒州大業二年廢莒州以縣屬沂州

蒙山在縣東南八十八里書曰蒙羽其藝

障山在縣東八十里出銷石石腦炬火等石居人常采爲貨

萊州東萊下開元戶二萬三千一百五 鄉四十三

禹貢青州之域卽古萊子國也齊滅之遷萊子於郕在齊國之東故曰東萊漢高帝四年韓信虜齊王廣分齊郡置東萊郡領縣十七理掖縣屬青州後魏獻文帝分青州置光州取界內光水爲名隋開皇二年改光州爲萊州隋末陷賊武德四年討平

綦順復爲萊州

州境東西四百二十八里南北二百四十一里

八到

西南至上都二千七百六十里  
西南至東都一千九百里  
東北至登州二百四十里  
正南微西至密州三百四十五里  
北至大海五十里  
西南至青州三百四十五里

貢賦

開元貢 黃銀 文蛤 滑石器 牛黃  
賦 絲 絹 貨布

管縣四

掖

即墨

昌陽

膠水

掖縣

上郭下

本漢舊縣也屬東萊郡按掖水出縣南三十五里寒

同山故縣取為名隋開皇三年罷郡屬萊州

萬里沙在縣東北三十里郊祀志武帝元封元年大旱禱萬里

沙

浮游島在縣西北四十里遙望島在海中若浮游然故名

海在縣北五十二里

膠水西去縣七十五里

海神祠在縣西北十七里

即墨縣

中 西北至州 二百六十三里

本漢舊縣也屬膠東國城臨墨水故曰

即墨高齊文宣帝併入膠水縣隋開皇末又於此置即墨縣屬

萊州

大勞山小勞山在縣東南三才八里晏謨齊記曰太白自言高

不如東海勞昔鄭康成領徒於此

海在縣東四十三里又在縣南一百里

壯武故城在縣西六十里晉封張華為壯武侯

昌陽縣

上 西北至州 一百九十九里

本漢舊縣也屬東萊郡置在昌水之陽

故名昌陽有鹽官隋開皇三年罷郡昌陽縣屬萊州

黃銀坑在縣東一百四十里隋開皇十八年牟州刺史辛公義

於此坑冶鑄得黃銀獻之大業末貞觀初更沙汰得之

奚養澤在縣西北四十里周禮職方氏幽州其澤藪曰奚養

膠水縣中北至本漢膠東國之地後漢省膠東國為膠東縣

屬北海國後魏屬北海郡隋開皇三年罷郡屬萊州仁壽元年

改為膠水縣

即墨故城在縣東南六十里右東齊之地史記蘇秦曰齊東有

琅邪即墨之饒此其處也齊湣王時燕將樂毅伐齊下七十餘

城唯莒即墨不下田單設奇策破燕軍迎襄王於莒盡復齊地

封單為安平君漢書曰漢元年項羽徙齊王田市於即墨為膠

東王田榮怒殺市於即墨自立為王遂併三齊之地漢膠東國

領八縣理即墨即此城也

平度故城在縣西北六十七里城西北有土山古今煮鹽處

淄州淄川開元戶三萬七千四百四 鄉七十一

禹貢青州之域周之九州為幽州之境職方氏幽州其浸菑時

州蓋取淄水為名也春秋及戰國時屬齊秦為齊郡之地在漢

為濟南郡之般陽縣也隋開皇十六年於今理改置淄州隋亂

陷賊武德元年重置淄州

州境東西一百一十五里

八到西南至上都二千二百九十五里

西南至東都一千四百三十五里

東至青州一百二十里

西南至兗州三百七十里

北渡河至棣州二百一十里

東南至沂州五百三十里

貢賦開元貢防風理石

管縣五 淄川 長山 鄒平 濟陽 高苑

淄川縣上郭下本漢般陽縣也屬濟南郡在般水之陽故名後漢

屬齊國晉省宋於此置貝丘縣隋開皇十八年改貝丘為淄川

縣屬淄州

淄水出縣理東南原山去縣六十里俗傳禹理水功畢土石黑數里之中波流若漆故謂之淄水

長山縣

上東南至州六十四里

本漢於陵縣地也宋武帝於此立武強縣

隋開皇十八年改武強為長山縣取長白山為名屬淄州武德元年置鄒州縣又屬焉八年廢鄒州依舊屬淄州

長白山在縣西南四十里

濟水西北去縣三十五里

鄒平縣

上東南至州一百二十里

本漢舊縣也屬濟南郡隋開皇三年自

梁鄒城移平原縣入鄒平城屬齊州今理是也十六年改屬淄州十八年改平原縣為鄒平縣復舊名也

黃河西北去縣八十里

濟水南去縣三十五里

濟陽縣

上東南至州九十四里

本漢梁鄒縣也屬濟南郡隋文皇於後漢

梁鄒城地置濟南縣大業二年省景龍元年於漢梁鄒城置濟

陽縣屬淄州

八會津在縣南一里相傳水陸所湊其路有八故名

濟水在縣南又東北入高苑縣界

高苑縣

上南至州一百一十里

本漢舊縣也屬千乘國後漢屬樂安國宋

於此置長樂縣屬渤海郡隋開皇十八年改為會城縣大業三年改為高苑縣取縣東南高苑故城為名隋末陷賊武德元年

重置高苑縣屬鄒州八年廢鄒州縣屬淄州

濟水北去縣七十步

千乘故城在縣北二十五里漢千乘國也

登州

東牟中

開元戶二萬八千五百三十三

鄉三十六

禹貢青州之域古萊子之國春秋齊侯滅萊至漢為東萊郡之地後魏孝靜帝分東萊於黃縣東一百步中郎故城置東牟郡高齊廢隋開皇三年改置牟州大業三年廢武德初又置因文登縣人不從賊黨遂於縣理置登州

州境

東西五百六十里南北一百六十五里

八到

西南至上都三千里西南至東都二千里北至海三千里

西至海四里當中國往新羅渤海過大路

正北微東至大海北岸都里鎮五百二十里

東至文登縣界大海四百九十里

東南至大海四百六十里南至萊州昌陽縣二百里南至大海六十里

貢賦

開元貢 牛黃 水蔥 麻布

管縣四 蓬萊 牟平 文登 黃

蓬萊縣

中郭下

本漢黃縣之地屬東萊郡昔漢武帝於此望蓬萊

山因築城以蓬萊為名在黃縣東北五十里貞觀八年於此置

蓬萊鎮神龍三年析黃縣置蓬萊縣在鎮南一里即今登州所

理是也

牟平縣

中州二百里

本漢縣也屬東萊郡有鐵官鹽官在牟山之

陽其地夷坦故曰牟平漢書齊悼惠王子將閭為牟平侯後屬

萊州武德四年於中郎城置牟州牟平縣屬焉貞觀元年牟州

及縣俱廢麟德二年析文登縣於此重置牟平縣屬登州

文登縣

上三百二十五里

本漢牟平縣也屬東萊郡高齊後帝分

牟平縣置文登縣屬長廣郡取縣界文登山為名隋開皇三年

廢長廣郡文登縣屬萊州武德元年改屬登州

之罘山在縣西北一百九十里史記曰始皇二十九年登之罘勒石紀功封禪書曰齊有八祀之罘爲陽主

成山在縣東北一百八十里史記曰秦始皇二十九年又東遊登成山升之罘勒石紀功郊祀志曰齊有八祠成山爲日主封禪書曰七曰日主祠成山

文登山在縣西北九十里

海在縣南六十里縣東一百八十里三面俱至於海縣東北海中有秦始皇石橋今海中時見有堅石似柱之狀

東牟故城在縣西北一百一十里漢高后二年封齊悼惠王子興居爲侯

不夜故城在縣東北八十五里屬東萊郡春秋時萊子所置初築此城有日夜出故名之

黃縣中東北至本漢舊縣也屬東萊郡隋開皇三年罷郡屬

萊州武德四年屬牟州神龍三年置登州黃縣割屬焉漢書曰

秦欲攻匈奴運糧使天下飛芻輓粟起於黃睡琅邪負海之郡

轉輸北河率三十鍾而致一石黃卽今黃縣睡卽今文登縣屬東萊郡睡直瑞反北河朔方已

北六斛四斗曰鍾計道路所費凡用一百九十二斛乃能致一石


萊山在縣東南二十里封禪書曰齊之八祀六日月主祠之萊山

故黃城在縣東南二十五里古萊子之國春秋傳曰齊侯滅萊杜注曰今萊黃縣是也

大人故城在縣北二十里司馬宣王伐遼東造此城運糧船從此入今新羅百濟往還常由於此

蓬萊鎮在縣東北五十里

海濱祠在縣北二十四里大人城上



元和郡縣圖志卷第十一終





